

舊唐書

五



唐書本紀卷第十七上

敬宗

文宗上

劉

响

聞人詮校刊沈桐同校

敬宗睿武昭愍孝皇帝諱湛穆宗長子母曰恭僖太后王氏元和四年六月七日生於東內之別殿長慶元年三月封景王二年十二月立爲皇太子四年正月壬申穆宗崩癸酉皇太子即位極前時年十六甲子左僕射韓臯卒丙子群臣準遺詔奏皇帝寶冊禮畢詔賞神策諸軍士人絹十匹錢十千畿內諸軍鎮絹十匹錢五千其餘軍鎮頒給有差內出綾絹三百萬段以助賞給穆宗初即位在京軍士人獲五十千在外軍鎮差降無幾至是宰臣奏議請量國力頒賞故差減於先朝物議是之羣臣五上章請聽政從之二月辛巳朔上縷服見羣臣於紫宸門外壬午渤海送備宿衛大聰獻等五十人入朝癸未貶戶部侍郎李紳爲端州司馬丙戌貶翰林學士駕部郎中知制

誥龐嚴爲信州刺史翰林學士司封員外郎知制誥 防爲汀州刺史皆紳之引用者以右拾遺吳思爲殿中侍御史充入蕃告哀使李紳之貶李逢吉受賀群官至中書而思獨不往逢吉怒而斥爲遠使戊子河北告哀使諫議大夫高允恭卒於東都辛卯勅沒掖庭宮人先配內園宮人並宜放出任其所適己亥冊大行皇帝皇太后爲太皇太后庚子西川節度使杜元穎進罽毼打毬衣五百事非禮也辛丑上始御紫宸殿受朝旣退幸飛龍院厚賜內官等物有差以米貴出太倉粟四十萬碩於兩市賤糶以惠貧民癸未夜太白犯東井北轅乙巳上率羣臣詣光順門冊皇太后丁未御中和殿擊毬賜教坊樂官綾綃三千五百匹戊申擊毬於飛龍院己酉大合樂於中和殿極歡而罷內官頒賜有差三月庚戌朔貶司農少卿李彤吉州司馬以前爲鄧州刺史坐贓百萬仍自刻德政碑故也壬子上御丹鳳樓大赦天下京畿夏青苗錢並放秋青苗錢每貫放二百文天下常貢之外不得進獻六宅十宅諸王女宜令每年於選人中選擇降嫁今

後戶帳田畝五年一定稅。定日風且雨。甲寅始於延英對宰臣。丙辰以尚書右丞韋顥爲戶部侍郎。戊午禮儀使奏外命婦正旦及四始日舊行起居之禮。伏以禮順則瀆。請停從之。庚申工部尚書胡証檢校戶部尚書京兆尹甲子故山南東道節度使牛元翼家爲王廷湊所害。上惜其冤橫傷悼久之。仍歎宰執非才縱姦臣跋扈。翰林學士韋處厚奏曰。理亂之本非有他術。順人則理。違人則亂。陛下當食歎息。恨無蕭曹。今有一裴度尚不能用。此馮唐所以感悟。漢文雖有頗牧不能用也。以太子少保張弘靖爲太子少師。分司東都。太子賓客令狐楚爲河南尹。丁卯以刑部尚書段文昌判左承事。戊辰羣臣入閣。日高猶未坐。有不任立而踣者。諫議大夫李渤出次白宰相俄而始坐。班退。左拾遺劉栖楚極諫。頭叩龍墀。血流上爲之動容。仍賜緋魚袋。編昨徐忠信闌入浴室。門杖四十配流。天德庚午賜內教坊錢一萬貫以備遊幸。是夜太白犯東井。北轅甲戌夏州節度使李祐奏於塞外築烏延有州。臨塞陰河。陶子等五城以備蕃寇。又以党項爲



盜於蘆亭關北木瓜嶺築壘以扼其衝乙亥幸教坊賜伶官綾給三千五百匹夏四月庚申朔甲申以御史大夫王涯爲戶部尚書兼御史大夫充鹽鐵轉運等使壬辰兵部侍郎武儒衡卒丙申賊張詔等百餘人至右銀臺門殺閤者揮兵大呼進至清思殿登御榻而食弓箭庫右神策軍兵馬使康藝全率兵入宮討平之是日上聞其變急幸左軍丁酉上還宮羣臣稱慶諫議大夫李渤以上輕易致盜言甚激切已亥九仙門等監共三十五人並笞之辛丑染坊使田晟段政直流天德以張韶染坊役夫故也詔雪吐突承璀之罪令男士晔改葬之丙午宰臣李逢吉封涼國公牛僧孺封奇章縣子五月己酉朔乙卯制以正議大夫尚書吏部侍郎上柱國渭源縣開國男食邑三百戶賜紫金魚袋李程守本官同中書門下平章事以朝議郎守尚書戶部侍郎兼御史大夫判度支上柱國賜紫金魚袋竇易直爲朝散大夫本官同中書門下平章事判度支戶部侍郎韋顥賜金紫已未割富平縣之豐水鄉下邽縣之翟公鄉澄城縣之撫道鄉白水

縣之會賓鄉以奉景陵癸亥以鹽州刺史傅良弼為夏州節度使東都江陵監大轉運留後並改為知院官從其使王涯請也六月己卯朔以左神策大將康日全為鄜坊節度使辛巳勅以霖雨命䟽決京城三囚與辰大風吹壞延喜景風等門工部侍郎張惟素卒壬辰以左金吾衛大將軍李愿檢校司空兼河中尹御史大夫充河中絳隰等州節度使丙申山南西道節度使守司空裴度加同中書門下平章事度之拜興元也為宰相李逢吉所排不帶平章事李程韋處厚日為度論於上前故有是命加陳許節度使李光顏守司徒癸卯太保張弘靖卒己巳浙西水壞太湖堤水入州郭漂民廬舍丁未以吏部尚書趙宗儒為太常卿兵部尚書鄭絪為吏部尚書秋七月戊申朔己酉睦州青溪等六縣大雨山谷發洪水泛溢漂城郭廬舍庚辰以前河中節度使郭釗為兵部尚書戊午太子賓客許季同卒辛酉䟽靈州特進渠置營田六百頃乙丑鄆曹濮暴雨水溢壞城郭廬舍丁卯勅以穀貴凡給百官俸內一半合給匹段今宜給粟每斛折錢五

十文辛未以大理卿崔元略為京兆尹兼御史大夫甲戌左金吾衛  
大將軍李祐進馬二百五十匹御史溫造於閣內奏彈祐罷使違勅  
進奉祐趨出待罪詔宥之襄均復等州漢江溢漂民廬舍丙子浙西  
觀察使李德裕奏詔令當道造盂子二十具計用銀一萬三千兩金  
一百三十兩昨已進段具用銀一千三百兩當道在庫貯備銀無二  
三百兩皆百計收市方成此兩具臣當道唯有畱使錢五萬貫每事  
節儉支費猶欠十三萬貫不足臣若因循不奏則負陛下任使之恩  
若分外誅求又累陛下茲儉之德伏乞宣令宰臣商議何以遣臣得  
上不違宣索下不闕軍須公不困疲人不斂物怨時有詔罷進奉故德  
裕有是奏八月丁酉朔是夜火犯土星妖賊馬文忠與品官季文德  
等凡一千四百人將圖不軌皆杖一百處死癸未火犯東井甲寅詔  
於關內關東折羅和羅帶一百五十萬石陳許蔡鄆曹濮等州水害  
秋稼丁亥火入東井己丑以李愷孫宏為河南府兵曹叅奏  
清孫鄴為伊陽令錄忠臣後也是夜金犯軒轅右角壬辰江王府長

史段釗上言稱前任龍州刺史近郭有牛心山山上有仙人李龍遷祠頗靈應玄宗幸蜀時特立祠廟上遣高品張士謙往龍州檢行迴奏牛心山有掘斷處羣臣言宜須脩築時方以寒役民數萬計東川節度使李絳表訴之甲子以太常卿趙宗儒爲太子少師乙巳宣武軍節度韓充卒九月丙午朔丁未波斯大商李蘇沙進沉香亭子材拾遺李漢諫云沉香爲亭子不異瑤臺瓊室上上怒優容之庚戌以河南尹令狐楚檢校禮部尚書汴州刺史宣武雷節度宋汴毫觀察等使乙卯罷理亂使以諫議大夫李渤知亂奏請置胥吏添課料故也戊午加朱克融檢校司空詔浙西織造可幅盤條撩綾一千匹觀察使李德裕上表論諫不奉詔乃罷之己巳以兵部侍郎王起爲河南尹甲子吐蕃遣使求五臺山圖己巳浙西淮南各進宣索銀粧奩三具冬十月丙子朔宗正寺選尚縣主壻和元亮等二十五人各賜錢三十万令備吉礼辛巳以吏部侍郎崔從爲太常卿庚子嶺南節度使鄭權卒辛丑吐蕃貢墜牛鑄成銀犀牛羊鹿各一壬寅以鄂岳觀

察使檢校兵部尚書崔植檢校吏部尚書兼廣州刺史御史大夫充  
嶺南節度觀察經略使以戶部侍郎韋顓為御史中丞兼戶部侍郎  
以御史中丞鄭覃權知工部侍郎以刑部侍郎韋弘景為吏部侍郎  
以權知禮部侍郎李宗閔權知兵部侍郎以工部侍郎于敖為刑部  
侍郎十一月丙午朔戊申安南都護李元素奏黃家賊與環王國合  
勢陷睦州殺刺史葛維蘇常湖嶽吉潭柳等七州水傷稼庚申葬穆  
宗于光陵十二月乙亥朔癸未迴紇吐蕃奚契丹遣使朝貢襄州柳  
公綽滄州李全畧晉州李寰滑州高承簡並自尚書加檢校右僕射  
以前起居舍人劉栖楚為諫議大夫淮南節度使王播厚賂貴要求  
領鹽鐵使諫議大夫獨孤朗張仲方起居郎孔敏行柳公權宋申錫  
補闕韋仁實劉敦儒拾遺李景讓薛廷老等伏延英抗疏論之戊子  
夜月掩東井庚寅加天平軍節度使烏重胤同平章事乙未徐泗王  
智與請置僧尼戒壇浙西觀察使李德裕奏狀論其姦幸時自憲宗  
朝有勅禁私度戒壇智與冒禁陳請蓋緣久不興置由是天下沙門

奔走如不及智興邀其厚利由是致富時議醜之丁酉宰相牛僧孺進封奇章郡公李程彭原郡公賈易直晉陽郡公並食邑三千戶吏部侍郎韓愈卒

寶曆元年春正月乙巳朔辛亥親祀昊天上帝于南郊禮畢御丹鳳樓大赦改元寶曆元年先是鄆縣令崔發坐誤辱中官下獄是日與諸囚陳於金鷄竿下俟釋放忽有內官五十餘人環發而毆之發破面折齒臺吏以蓆蔽之方免有詔復繫於臺中宰相救之方釋宰相牛僧孺累表乞解機務帝許以郊禮後乙卯以僧孺檢校禮部尚書同平章事鄂州刺史充武昌軍節度鄂岳觀察使淮南節度使王播兼諸道鹽鐵轉運使於鄂州特置武昌軍額寵僧孺也壬申以給事中李渤爲桂州刺史兼御史中丞挂管防禦觀察使李德裕獻丹扆箴六首上深嘉之命學士韋處厚優其荅詔辛卯以前禮部郎中李翱爲廬州刺史以求知制誥面數宰相李逢吉過故也辛丑江西觀察使薛放卒癸卯以職方郎中知制誥王璠爲御史中丞三月乙巳

朔以兵部尚書郭釗爲梓州刺史劍南東川節度使壬子宴群臣於  
三殿戊辰夜有流星長三丈出紫微入濁滅辛未以前桂管觀察使  
殷侑爲江西觀察使上御宣政殿試制舉人二百九十一人以中書  
舍人鄭涵吏部郎中崔瑄兵部郎中李虞仲並充考制策官夏四月  
甲戌朔宰相涼國公李逢吉進封鄭國公以右神策大將軍康志睦  
檢校工部尚書兼青州刺史平盧軍節度使宣中書以諫議大夫劉  
栖楚爲刑部侍郎丞郎宣授自栖楚始也鄭涵等考定制舉人勅下  
後數日上謂宰相曰韋端符楊魯士皆涉物議宜與外官乃授端符  
白水尉魯士誠固尉宰臣請其罪名不報癸巳群臣上徽號曰文武  
大聖廣孝皇帝御宣政殿受冊禮畢御丹鳳樓大赦天下大辟罪已  
下無輕重咸赦除之時李紳貶官李逢吉惡紳不欲紳量移乃於赦  
書節文內但言左降官已經量移宜與量移近處不言未量移者宜與  
量移翰林學士上疏論列云不可爲李紳一人與逢吉相惡遂令近  
年流貶官皆不得量移則乖曠蕩之道也帝遽命追赦書添改之乙

亥以劔南東川節度檢校司空李絳爲左僕射御史蕭徹彈京兆尹兼御史大夫崔元略違詔徵畿內所放錢萬七十貫付三司勘鞫不虛辛丑勅削元略兼御史大夫五月甲辰朔以前平盧軍節度使檢校左僕射兼戶部尚書賜振武軍錢一十四萬貫脩築東受降城庚戌幸魚藻宮觀競渡庚申正衙命使冊九姓迴紇登里囉汨沒密施毗伽昭禮可汗丙寅太子少傅致仕閻濟美卒丁卯湖南觀察使沈傳師奏當道先配吐蕃羅沒等一十七人準赦放還本國今各得狀不愿還從之庚午以右金吾將軍李文悅爲豐州刺史天德軍防禦使安南李元喜奏移都護府於江北岸六月壬申朔乙酉詔公主郡主並不得進女口丙戌將作監張武均出爲洋州刺史坐贓犯也諸司白身馮志謀等三百九人並賜綠丁亥命品官田務豐領國信十二車賜迴紇可汗及太和公主已丑河中節度使檢校司空李愿卒乙未以檢校左僕射兼戶部尚書薛平檢校司空河中尹河中節度使秋七月癸卯朔以忠武軍節度使守司徒兼侍中李光顏爲太原



尹北京畱守以河東節度使王沛爲許州刺史忠武軍節度使樊感  
犯右執法甲辰鹽鐵使王播進美餘絹一百萬匹仍請日進二萬計  
五十日方畢播自掌鹽鐵以正入錢進奉以希寵固位託稱美餘物  
議欲鳴鼓而攻之乙酉鄆坊水壞廬舍癸丑以右金吾衛大將軍張  
茂宗爲充海沂密節度使乙卯正衙命使冊司徒李光顏丙辰淄王  
傳分司元錫卒己未詔王播造競渡船二十隻供進仍以船材京內  
造時計其功當半年轉運之費諫議大夫張仲方切諫乃改進十隻  
辛酉萬年縣典賈鎮誣告故統軍王佖男王謨等七人謀亂詔杖殺  
之甲子夜月犯畢乙丑侍講學士崔鄆高重進纂要十卷賜錦綵二  
百匹丁卯以戶部侍郎韋顥爲吏部侍郎京兆尹崔元略爲戶部侍  
郎奉天縣水壞廬舍辛未以左散騎常侍胡証爲戶部尚書判度支  
太子賓客分司盧士攻卒閏七月壬午朔以權知工部侍郎鄭覃爲  
京兆尹甲申拾遺李漢舒元褒薛廷老於閣內論曰伏見近日除授  
往往不由中書進擬多是內中宣出臣恐紀綱滯壞姦邪恣行伏希

詳察上然之詔度支進銅三千觔金薄十萬翻修清思院新殿及昇陽殿圖障丙戌戶部尚書致仕裴堪卒戊子以給事中盧元輔爲工部侍郎壬辰以前河東節度使李聽爲義成軍節度使戊戌以刑部尚書段文昌爲兵部尚書依前判左承事八月辛丑朔戊申以鄴國公楊造男元湊襲鄴國公食邑三千戶兩京河西大稔勅度支和糴折糴粟二百萬石乙卯夜太白近房戊午遣中使往湖南江南等道及天台山採藥時有道士劉從政者說以長生久視之道請於天下求訪異人冀獲靈藥仍以從政爲光祿少卿號昇玄先生秋九月辛未朔丁丑衛尉卿劉遵古役人安再榮告前素王府長史武昭謀害宰相李逢吉詔三司鞠之壬午昭義節度使劉悟卒癸未夜太白犯南斗丙戌夜月犯右執法丁酉華州暴水傷稼徐州王智興奏大將武華等四百人謀亂並伏誅十月庚子朔河南尹王起奏盜銷錢爲佛像者請以盜鑄錢論丁巳振武節度使張惟清以東受降城濱河歲久雉堞摧壞乃移置於綏遠峰南及是功成己未以崖州安置人嗣郢王佐

爲穎王府長史分司東都仍賜金紫壬戌夜太白近哭星甲子三司  
鞠武昭獄得實武昭及弟彙役人張少騰宜付京兆府決河陽節度  
掌書記李仲言配流象州彙流崖州太學博士李涉流康州皆坐武  
昭事也十一月庚午朔辛未以御史中丞王璠爲工部侍郎以諫議  
大夫獨孤朗爲御史中丞癸酉鎮星近東井癸未以殿中少監嚴公  
素爲容管經略使是夜月犯東井庚寅車駕幸溫湯即日還宮壬辰  
以刑部侍郎劉栖楚爲京兆尹丙申詔封皇子普爲晉王丁酉吏部  
侍郎韋顗卒十二月己亥朔辛丑以晉王普爲昭義軍節度副大使  
以劉悟子將作監主簿從諫起復雲麾將軍守金吾衛大將軍同正  
檢校左散騎常侍兼御史大夫充昭義節度畱後戊申夜月犯畢其  
夜北方有霧起須臾遍天霧上有赤氣久而方散甲子以左僕射李  
絳爲太子少師分司東都戊辰勅農功所切實在耕牛疲暍多乏須  
議給賜委度支往河東振武靈夏等州市耕牛一萬頭分給畿內貧  
下百姓是歲淮南浙西宣襄鄂潭湖南等州言旱傷稼

二年春正月己巳朔辛未貶殿中侍御史王源植爲昭州司馬時源植街行爲教坊樂伎所侮導從呵之遂成紛競京兆尹劉栖楚決青樂伎御史中丞獨孤朗論之太切上怒遂貶源植庚午湖南觀察使沈傳師奏奉詔校尋葉靖能羅光遠文案檢尋不獲癸酉右贊善大夫李光琬與品官李重寶爭忿以笏擊重寶流血上以宗屬罰兩月俸料甲戌以諸軍丁夫二萬入內穿池脩殿辛巳興元節度使裴度奏脩斜谷路及館驛皆畢功壬辰裴度來朝甲午以衛尉卿劉遵古爲湖南觀察使以國子祭酒衛中行爲福建觀察使丙申鹽鐵使王播奏揚州城內舊漕河水淺舟船溢滯輸不及期程今從閶門外古七里港開河向東屈曲取禪智寺橋東通舊官河計長一十九里其功役所費當使自方圓支遣從之二月己亥朔辛丑容管經略使嚴公素奏當州普寧等七縣請同廣昭桂賀四州例北選從之丙午夜月犯畢丁未以山南西道節度觀察處置等使光祿大夫守司空同中書門下平章事與元尹上柱國晉國公裴度守司空同平章事復知政事丁巳寒

食節三殿宴群臣自戊午至庚申方止丙寅正冊司空裴度丁卯以禮部尚書王涯檢校左僕射爲山南西道節度使三月戊辰朔命興唐觀道士孫準入翰林待詔辛未江西觀察使殷侗請於洪州寶歷寺置僧尼戒壇勅殷侗故違制令壇置戒壇罰一季俸料甲戌賜宰臣百寮上巳宴于曲江亭乙亥右散騎常侍李翱卒戊寅辛魚藻宮觀競渡辛巳以同州刺史蕭俛爲太子少保分司壬午以工部尚書裴武爲同州刺史癸未嶺南節度使崔植奏廣湖封雷潘辯等七州戍軍除折衝別將外並請停從之丙戌昆明夷遣使朝貢丁亥勅冊才人郭氏爲貴妃丙申以吏部侍郎韋弘景爲陝虢觀察使四月戊戌朔橫海軍節度使李全略卒壬寅以右金吾衛大將軍高承簡爲邠寧慶節度使丙午王廷湊檢校司空戊申昭義節度使留後劉從諫檢校工部尚書充昭義節度副大使知節度事庚戌鄂嶽觀察使牛僧孺奏當道沔州與鄂州隔江相對總一里餘其州請併省其漢陽汶川兩縣隸鄂州從之丙辰右金吾衛大將軍高霞寓卒丙寅先是

王廷湊請於當道立聖德碑是日內出碑文賜廷湊五月戊辰朔上御宣和殿對內人親屬一千二百人並於教坊賜食各頒錦綵辛未祕書省著作郎韋公肅注太宗所撰帝範十二篇進特賜錦綵百匹甲戌以涇原節度楊原卿爲河陽三城懷州節度使以金吾衛大將軍李祐爲涇原節度使是夜月近太微星浙西送到絕粒女道士施子微戊寅幸魚藻宮觀競渡庚辰中使自新羅取鷹鵠迴幽州軍亂殺其帥朱克融及男延齡軍人立其第二子延嗣爲畱後辛巳神策軍苑內古長安城中脩漢未央宮掘獲白玉床一張長六尺癸未山人杜景先於光順門進狀稱有道術令中使押杜景先往淮南及江南湖南嶺南諸州求訪異人甲申以右丞丁公著爲兵部侍郎以前湖南觀察使沈傳師爲尚書左丞辛卯贈朱克融司徒甲午夜熒惑犯昴賜興唐觀道士劉從政脩院錢二萬貫六月丁酉朔賜御史中丞獨孤朗金紫丁巳減放苑內役人二千五百帝性好土木自春至冬興作相繼庚申鄆州進驢打毬人石定寬等四人是夜太白犯昴

辛酉幸凝碧池令兵士千餘人於池中取大魚長大者送入新池癸亥以旱命京城諸司䟽理繫囚以延康坊官宅一區爲諸王府司局甲子上御三殿觀兩軍教坊內園分明驢鞠角抵戲酣有碎首折臂者至一更二更方罷秋七月丙寅朔乙亥河中進力士八人癸未衡王絢薨癸巳勅鄆縣漢陂尚食管係太倉廣運潭復賜司農寺八月丙申朔以司空平章事裴度判度支以工部侍郎王播爲河南尹代王起以起爲吏部侍郎以前福州觀察使徐晦爲工部侍郎是夜太白近太微令供奉道士二十人隨浙西處士周息元入內宮之山亭院上問以道術言識張果葉靜能浙西觀察使李德裕上䟽言息元誕妄無異於人庚戌以太府卿李憲爲江西觀察使丁丑夜月犯輿鬼加京兆尹劉栖楚兼御史大夫癸丑以太常卿崔從檢校吏部尚書判東都尚書省事兼御史大夫東都畱守東畿汝都防禦使九月丁丑朔大合宴於宣和殿陳百戲自甲戌至丙子方已戊寅河東節度使守司徒兼侍中李光顏卒出內庫錢萬貫令內園召募力士幽

州監軍奏都知兵馬使李再義與弟再寧同殺朱延嗣并其家屬三百餘人推再義爲畱後壬申宰相李程爲北都畱守河東節度使勅戶部所管同州長春宮莊宅宜令內莊宅使管係冬十月乙未朔乙亥以幽州衙前都知兵馬使李再義檢校戶部尚書充盧龍軍節度副大使知節度使仍賜名載義壬戌以中書舍人崔郾爲禮部侍郎十一月甲子朔以太清宮道士趙歸真充兩階道門都教授博士帝好深夜自捕狐狸宮中謂之打夜狐中官許遂振李少端兼志弘以侍從不及削職壬申以戶部尚書胡証檢校兵部尚書兼廣州刺史充嶺南節度使甲申以右僕射同平章事李逢吉檢校司空同平章事兼襄州刺史充山南東道節度使臨漢監牧使乙酉同州刺史裴武卒己丑詔朝官及方鎮人家不得置私白身癸巳以前東都畱守楊於陵爲太子少傅中官李奉義王惟直成守貞各杖三十分配諸陵宣徽使閔弘約副使劉弘逸各杖二十十二月甲午朔辛丑帝夜獵還宮與中官劉克明田務成許文端打毬軍將蘇佐明王嘉憲石



定寬等二十八人飲酒帝方酣入室更衣殿上燭忽滅劉克明等同謀害帝即時殂於室內時年十八羣臣上諡曰睿武昭愍孝皇帝廟號敬宗太和元年七月十三日葬于莊陵

史臣曰古人謂堯無子舜無父言其賢不肖之相遠也以文惠驕誕之性繼之以昭愍固其宜也而昭獻昭肅英特不羣文足以緯邦家武足以平禍亂三子之操行頓異其何道哉寶曆不君國統幾絕天未降喪幸賴裴度復任弼諧彼狡童兮夫何足議

文宗元聖昭獻孝皇帝諱昝穆宗第二子母曰貞獻皇后蕭氏元和四年十月十日生長慶元年封江王初名涵寶曆二年十二月八日敬宗遇害賊蘇佐明等矯制立絳王勾當軍國事樞密使王守澄中尉梁守謙率禁軍討賊誅絳王迎上于江邸癸卯見宰臣于閣內下教處分軍國事甲辰僧惟真齊賢正簡道士趙歸真並配流嶺南擊毬軍將于登等六人令本軍處置宰臣百寮三上表勸進乙巳即位於宣政殿丙午上赴西宮成服丁未宰臣百寮上表請聽政三表許

之道士紀處玄楊沖虛伎術人李元戢王信等並配流嶺南戊申尊聖母爲皇太后己酉勅鳳翔淮南先進女樂二十四人並放歸本道庚戌以正議大夫尚書兵部侍郎知制誥充翰林學士柱國賜紫金魚袋韋處厚爲中書侍郎同中書門下平章事以翰林學士路隨承旨侍講學士宋申錫充書詔學士丙辰以山南東道節度使柳公綽爲刑部尚書丁巳爲絳王舉哀廢朝三日庚申詔君天下者莫尚乎崇澹泊子困窮遵道以端本推誠而達下故聖祖之誠以慈儉爲寶大易明訓垂簡易之文未有上約而下不豐欲寡而求不給朕以眇薄遭逢內難刷君父之讐耻據億兆之哀寃而股肱大臣羣卿庶士引義抗請至于再三以圖宗社之安以蒼華夷之望俯從衆欲夙夜震兢思所以克己復禮脩政安人宵興匪寧旰食勞慮夫儉過則酌之以禮文勝則矯之以質庶乎俗登太古道洽生靈儀刑家邦以化天下內庭宮人非職掌者放三千人任從所適長春宮斛斗諸物依前戶部收管鄠縣漢陂鳳翔府洛谷地還府縣教坊樂官翰林待詔伎

術官并總監諸色職掌內冗員者共一千二百七十人並宜停廢摠  
監中一百二十四人先屬諸軍並各歸本司餘七百三人勒納牒身  
放歸本管先供教坊衣糧一百分廂家及諸司新加衣糧三千分並  
宜停給五方鷹鷄並解放今年新宣附食度支衣糧小兒一百人並  
停給別詔宣纂組雕鏤不在常貢內者並停度支鹽鐵戶部及州府  
百司應供宮禁年支一物已上並準貞元元額爲定先造供禁中床  
榻以金筐瑟瑟寶佃者悉宜停造東頭御馬坊毬塲宜卻還龍武軍  
其殿及亭子所司毀拆餘舍賜本軍應行從處張陳不得用花蠟結  
綵華飾今年已來諸道所進音聲女人各賜束帛放還城外墳墓先  
有開斲以備行幸處宜曉示百姓任其脩塞其大逆魁首蘇佐明等  
二十八人並已處斬宗族籍沒妖妄僧惟貞道士趙歸真等或假於  
卜筮或託以醫方疑衆挾邪已從流竄其情非姦惡迹涉誑悞者一  
切不問兇徒旣殄寰宇佇康載舉今猷用弘庶績布告中外知朕意  
焉帝在藩邸知兩朝之積弊此時輦革並出宸衷士民相慶喜理道

之復興矣壬戌以前江西觀察使殷侑爲大理卿

太和元年春正月癸亥朔庚午以御史中丞獨孤朗爲戶部侍郎以兵部尚書權判左丞事段文昌爲御史大夫是夜月掩畢大星戊寅以左散騎常侍李益爲禮部尚書致仕以京兆尹劉栖楚爲桂管觀察使以前戶部侍郎于敖爲宣歙觀察使代崔群以群爲兵部尚書癸未以吏部侍郎庾承宣爲京兆尹兼御史大夫丙申復置兩輔六雍十望十緊三十四州別駕其諸色在京及內外諸軍使等職事並不在挾名限已亥以右散騎常侍集賢殿學士判院事張正甫爲工部尚書辛丑以前廣州節度使崔植爲戶部尚書以太子少師分司東都李絳檢校司空兼太常卿乙巳御丹鳳樓大赦改元太和甲寅勅諸道節度觀察使去任日宜具交割狀仍限新使到任一月分析聞奏以憑殿最丙辰以華州刺史錢徽爲尚書右丞以前河陽節度使崔弘禮爲華州鎮國軍使已未以太子少保分司蕭俛爲檢校右僕射兼禮部尚書庚申以虔州刺史韓約爲安南都護三月庚戌朔右

軍中尉梁守謙請致仕以樞密使王守澄代之戊寅以前蘇州刺史白居易爲祕書監仍賜金紫壬午幽州李載義奏故張弘靖判官家屬凡一百九十人並送赴闕四月壬辰朔癸巳以太子少傅楊於陵守右僕射致仕俸料全給甲午鳳翔築臨汧城於汧陽縣西北八十里壬寅毀昇陽殿東放鴨亭戊申毀望仙門側看樓十間並敬宗所造也以前亳州刺史張遵爲邕管經略使乙卯以禮部尚書蕭俛爲太子少師分司己未忠武軍節度使王沛卒庚申以太僕卿高瑀檢校左散騎常侍充忠武軍節度使己巳貶山南東道節度副使李續爲涪州刺史山南東道行軍司馬張又新爲汀州刺史李逢吉黨也五月壬戌朔戊辰詔元首股肱君臣象類義深同體理在坦懷夫任則不疑疑則不任然自魏晉已降叅用霸制虛儀搜索因習尚存朕方推表大信置人心腹庶使諸侯方嶽鼓洽道化夷貊飛走暢泳治功況吾台宰又何間焉自今已後紫宸坐朝衆寮旣退宰臣復進奏事其監搜宜停丙子以天平軍節度使守司徒同中書門下平章事烏

重胤爲橫海軍節度使以前攝橫海軍節度副使檢校國子祭酒侍御史李同捷檢校左散騎常侍兼兗州刺史充海沂密等州節度使就加魏博史憲誠同平章事甲申淮南節度鹽鐵轉運等使王播來朝丙戌夜焚惑犯右執法六月辛卯朔勅文武常叅官朝叅不到據料錢多少每置罰二十五文癸巳以淮南節度副大使知節度事管內營田觀察處置臨漢監牧等使兼諸道鹽鐵轉運等使銀青光祿大夫檢校司空同中書門下平章事揚州大都督府長史上柱國太原縣開國伯食邑七百戶王播可尚書左僕射同中書門下平章事依前充諸道鹽鐵轉運使以御史大夫段文昌代播爲淮南節度使丙申左司郎中兼侍御史知雜溫造權知御史中丞癸卯詔元和長慶中皆因用兵權以濟事所下制勅難以通行宜令尚書省取元和已來制勅叅詳刪定訖送中書門下議定聞奏甲寅以旱放繫囚七月辛酉朔癸亥太常卿李絳進封魏國公李同捷除兗海不受詔結幽鎮謀叛癸酉葬敬宗于莊陵辛巳勅今年權于東都置舉徐州

王智興請全軍計李同捷八月庚寅朔以工部侍郎獨孤朗爲福建觀察使以太府卿裴弘恭爲黔中經略使觀察使左僕射致仕楊於陵讓全給俸料許之庚子詔削奪李同捷在身官爵復以張茂宗爲充海沂密節度使辛丑邠寧節度使高崇簡卒壬寅以刑部尚書柳公綽檢校左僕射充邠寧節度使戊申以諫議大夫張仲方爲福建觀察使癸丑前福建觀察使獨孤朗卒九月庚申朔癸亥以左神策軍將軍知軍事何文哲爲鄜坊丹延節度使甲戌以左神策大將軍知軍事李泳爲單于都護充振武麟勝節度使丁丑浙西觀察使李德裕浙東觀察使元稹就加檢校禮部尚書壬午桂管觀察使劉栖楚卒丙戌以諫議大夫蕭裕爲桂管觀察使癸丑充州復置萊蕪縣十一月己未朔丙申河中薛平奏虞鄉縣有白虎入靈峯觀天平橫海等軍節度使守司徒同中書門下平章事烏重胤卒庚辰以保義軍節度晉慈等州觀察處置等使李寰爲橫海軍節度使癸巳以晉州慈州復隸河中癸巳以左承錢徽爲華州刺史丁酉右金吾衛大

將軍王公亮爲潭州刺史湖南觀察使

二年春正月戊午朔壬申以右散騎常侍孔戢爲京兆尹二月丁亥朔以兵部侍郎王起爲陝虢觀察使代韋弘景以弘景爲尚書左丞乙巳以刑部侍郎盧元輔爲兵部侍郎祕書監白居易爲刑部侍郎庚戌勅李絳所進則天太后刪定北人本業三卷宜令所在州縣寫本散配鄉村三月丁丑朔度支奏京兆府奉先縣界鹵池側近百姓取水栢柴燒灰煎鹽每一石灰得鹽一十二觔一兩亂法甚於鹹土請行禁絕今後犯者據灰計鹽一如兩池鹽法條例科斷從之辛巳上御宣政殿親試制策舉人以左散騎常侍馮宿太常少卿賈諫庫部郎中龐嚴爲考制策官閏三月丙戌朔內出水車樣令京兆府造水車散給緣鄭白渠百姓以溉水田夏四月丙辰朔壬午以邕管經略使王茂元爲容管經略使五月乙酉朔丁巳命中使於漢陽公主及諸公主第宣旨今後每遇對日不得廣挿釵梳不須著短窄衣服乙未以吏部侍郎丁公著爲禮部尚書庚子勅應諸道進奉內庫四



節及降誕進奉金花銀器并纂組文

續雜物並折充鈺銀及綾絹

其中有賜與所須待五年後續有進止帝性恭儉惡侈靡庶人務敦本故有是詔帝與侍講學士許康佐語及取蚺蛇膽生剖其腹爲之惻然乃詔度支曰每年供進蚺蛇膽四兩桂州一兩賀州二兩泉州一兩宜於數內減三兩桂賀泉三州輪次歲貢一兩帝自撰集尚書中君臣事迹命畫工圖於太液亭朝夕觀覽焉王廷湊出兵侵鄰藩欲撓王師以援李同捷昭義劉從諫請出軍討之六月乙卯朔晉王昔薨贈爲悼懷太子陳州水害秋稼癸亥四方館請賜印其文以中書省四方館爲名辛酉以吏部尚書鄭綱爲太子少保辛巳以靈武節度使李進誠爲邠寧節度使以天德軍使李文悅爲靈武節度使乙酉以前邠寧節度使柳公綽檢校左僕射兼刑部尚書甲辰詔宰臣集三署四品已上常叅官議討王廷湊可否是夜彗西出攝提南長二尺八月甲寅朔丁巳以兵部侍郎盧元輔爲華州鎮國軍使以代錢徽以徽爲吏部尚書致仕壬戌京畿奉先等十七縣水九月甲申

朔丁亥王智興拔棣州以新除橫海軍節度使李寰爲夏州節度使  
甲午詔削奪王珣湊在身官爵隣道接界隨便進討以前夏州節度  
使傅良弼爲橫海軍節度使庚戌安南軍亂逐都護韓約冬十月癸  
丑朔丁巳罷揚州海陵監牧以戶部尚書崔植爲華州刺史鎮國軍  
使丙寅嶺南節度使胡証卒辛未以江西觀察使李憲爲嶺南節度  
使癸酉以尚書右僕射同平章事竇易直檢校左僕射同平章事充  
山南東道節度使臨漢監牧等使代李逢吉以逢吉爲宣武軍節度  
使代令狐楚以楚爲戶部尚書以右丞沈傳師爲江西觀察使己卯  
以河南尹王璠爲右丞以左散騎常侍馮宿爲河南尹十一月癸未  
朔乙酉以右金吾衛大將軍李祐爲橫海軍節度使新除傅良弼赴  
鎮卒於陝州故也甲辰禁中已時昭德寺火直宣政殿之東至午未  
間北風起火勢益甚至暮稍息十二月壬子朔乙丑魏博行營都知  
兵馬使开志紹率所部兵馬二萬人謀叛欲殺史憲誠父子壬申中  
書侍郎同平章事韋處厚暴卒戊寅詔以兵部侍郎知制誥充翰林

學士路隨爲中書侍郎同平章事

三年春正月壬午朔丙戌開志紹率兵迴據永濟縣其衆分散入諸縣邑史憲誠告難詔滄州行營兵士赴之丁亥京兆尹孔戢卒庚寅吏部尚書致仕錢徽卒庚子李聽殺敗開志紹兵志紹北走鎮州甲辰以太常卿李絳檢校司空兼興元尹山南西道節度使華州刺史鎮國軍潼關防禦使崔植卒己酉以前山南西道節度使王涯爲太常卿二月辛亥朔以兵部尚書崔群爲荆南節度使甲寅荆南節度使王潛卒三月辛巳朔以戶部尚書令狐楚爲東都留守乙酉勅兵戈未息教坊每日祇候樂人宜權停壬辰易定節度使柳公濟卒以前東都留守崔從爲戶部尚書夏四月庚午王智興奏部下將石雄搖扇軍情請行朝典乃長流白州五月己卯朔甲申栢耆斬李同捷於將陵滄景平李祐入滄州丁亥御興安樓受滄州所獻李祐送李同捷母妻及男元達等赴闕詔並宥之令於湖南安置貶滄德宣慰使諫議大夫栢耆循州司馬宣慰判官殿中侍御史沈亞之虔州南

康尉以擅入滄州取李同捷諸鎮所怒奏論之也丙申橫海軍節度使李祐卒以涇原節度使李祐爲齊德等州節度使改各有裕丁酉以前義武軍節度使傅毅爲滄州刺史橫海軍節度使辛丑以右金吾衛大將軍張惟清檢校司空充涇原節度使以左金吾衛大將軍劉遵古爲邠寧節度使六月己酉朔辛亥以魏博節度使史憲誠檢校司徒兼侍中河中尹充河中晉絳節度使以義成軍節度使李聽兼充魏博節度使以魏博節度副使檢校工部尚書史孝章爲相衛節度使壬申勅元和四年勅禁鉛錫錢皆納官許人糾告一錢賞百錢此爲太過此後以鉛錫錢交易者一貫以下州府常行杖決脊杖二十十貫以下決六十徒三年過十月已上集衆決殺能糾告者一貫賞錢五十文秋七月己卯朔癸未中使劉弘逸送史憲誠旌節自魏州還稱六月二十六日夜魏博軍亂殺史憲誠立大將何進滔爲畱後其新節度使李聽入城不得乙丑河中節度使薛平依前河中節度使乙未嶺南節度使李憲卒兵部侍郎盧元輔卒丁酉以京兆

尹佳護爲御史大夫廣南節度使戊戌以大理卿李諒爲京兆尹乙巳以禮部尚書翰林侍講學士丁公著檢校戶部尚書兼潤州刺史充浙江西道觀察使以前浙西觀察使檢校禮部尚書李德裕爲兵部侍郎辛亥魏博何進滔奏準詔割相衛三州三軍不受壬子詔以魏博衙內都知兵馬使何進滔檢校左散騎常侍充魏博節度使癸丑以衛尉卿殷侑檢校工部尚書爲齊德滄節度使辛酉京畿奉先等九縣旱損田播州流人衛中行卒宋毫水害稼壬申詔雪王廷湊復官爵甲戌以吏部侍郎李宗閔同中書門下平章事九月戊寅朔辛巳勅兩軍諸司內官不得著紗縠綾羅等衣服帝性儉素不喜華侈駙馬韋處仁戴夾羅巾帝謂之曰比慕卿門地清素以之選尚如此巾服從他諸戚爲之唯卿非所宜也壬辰以兵部侍郎李德裕檢校戶部尚書兼滑州刺史義成軍節度使戊戌以前睦州刺史陸宣爲越州刺史浙東觀察使代元稹以稹爲尚書左丞代韋弘景以弘景爲禮部尚書冬十月戊申朔己酉江西沈傳師奏皇帝誕月請爲僧

尼起方等戒壇詔曰不度僧尼累有勅命傳師忝爲藩守合奉詔條誘致愚妄庸非禮道宜罰一月俸料丙辰以前義成軍節度使李聽爲太子少師癸亥以戶部侍郎崔元略爲戶部尚書判度支以中書舍人韋詞爲湖南觀察使十一月丁丑朔庚辰太子太傅鄭綱卒丙戌勅前亳州刺史李繁於京兆府賜死甲申帝親祀昊天上帝於南郊禮畢御丹鳳門大赦節文禁止奇貢云四方不得以新樣織成非常之物爲獻機杼織麗若花絲布撩綾之類並宜禁斷勅到一月機杼一切焚棄刺史分憂得以專達事有違法觀察使然後奏聞丙申西川奏南詔蠻入寇甲辰王智興來朝乙巳以智興守太傅依前平章事武寧軍節度使進封鴈門郡王十二月丁未朔南蠻逼戎州遣使起荆南鄂嶽襄鄧陳許等道兵赴援蜀川以劔南東川節度使郭釗爲西川節度使仍權東川事壬子貶劔南西川節度使杜元穎爲韶州刺史遣中使楊文端齎詔賜南蠻王蒙豐佑蠻軍陷邛雅等州戊午以右領軍衛大將軍董重質充神策西川行營都知兵馬使西川奏蠻軍陷成都府東川奏蠻軍入梓州西郭門下營又詔促諸鎮

兵救援西川己丑以東都畱守令狐楚檢校右僕射天平軍節度使  
代崔弘禮爲東都畱守 丁卯貶杜元穎循州司馬乙巳郭釗  
奏蠻軍抽退遣使賜蠻帥蒙蓋顓國信辛未以太子少師李聽爲邠  
寧節度使癸酉以中丞溫造爲右丞吏部郎中宇文鼎爲中丞

唐書本紀卷第十七上

唐書本紀卷第十七下

劉

昉

筆修

聞人詮校刊

沈樹同校

文宗下

太和四年春正月丙子朔辛卯武昌軍節度使牛僧孺來朝丙戌以  
左神策軍大將軍丘直方爲鄜坊節度使戊子詔封長男永爲魯王  
辛卯以武昌節度使鄂岳蘄黃安申等觀察處置等使金紫光祿大  
夫檢校吏部尚書同中書門下平章事上柱國竒章郡開國公牛僧  
孺爲兵部尚書同中書門下平章事壬辰以兵部侍郎崔郾爲陝虢  
觀察使封魯王母王氏爲昭儀癸巳以前邠寧節度使劉遵古爲劍  
南東川節度使甲午守左僕射同平章事諸道鹽鐵轉運使王播卒  
丙申以太常卿王涯爲吏部尚書充諸道鹽鐵轉運使辛丑以尚書  
左丞杜元穎檢校戶部尚書充武昌軍節度鄂岳蘄黃安申等州觀  
察使癸卯以前陝虢觀察使王起爲左丞二月丙午朔戊午興元軍



亂節度使李絳舉家被害判官薛齊趙存約死之庚申以左丞溫造  
爲興元節度使辛未夏州節度使李寰卒壬申以神策行營節度使  
董重質爲夏綏銀有節度使三月乙亥以河東節度使李程檢校左  
僕射同平章事兼河中尹晉絳磁隰等州節度使以刑部尚書柳公  
綽檢校左僕射太原尹北都留守河東節度使丁丑以前河中節度  
使薛平爲太子太保丁亥以衛尉卿桂仲武爲福建觀察使興元溫  
造奏害李絳賊首丘崧丘鑄及官健千人並處斬訖其親刃絳者斬  
一百段號令者三段餘並斬首內一百首祭李絳三十首祭死王事  
官寮其餘屍首並投於漢江己丑詔興元監軍使楊叔元宜配流康  
州百姓錮身遞於配所丁酉監修國史中書侍郎平章事路隨進所  
撰憲宗實錄四十卷優詔答之賜史官等五人錦繡銀器有差癸卯  
以淮南節度使段文昌檢校尚書左僕射同中書門下平章事兼江陵  
尹充荆南節度使以前太子賓客崔從檢校右僕射揚州大都督府  
長史淮南節度使甲辰以前荆南節度使崔群檢校右僕射兼太常

卿以中書舍人李虞仲爲華州刺史代嚴休復以休復爲右散騎常侍夏四月乙巳朔丙午以右散騎常侍翰林侍講學士鄭覃爲工部尚書丁未兵部尚書致仕張賈卒丁巳貶前齊德滄景等州節度使李有裕爲永州刺史馳驛赴任庚申以尚書左丞王起爲戶部尚書判度支代崔元略以元略檢校吏部尚書爲東都留守辛酉夜月掩南斗第二星壬戌詔曰儉以足用令出惟行著在前經斯爲理本朕自臨四海愍元元之久困日昃忘食宵興疚懷雖絕文繡之飾尚愧茅茨之儉亦諭卿士形于詔條如聞積習流弊餘風未革車服第室相高以華靡之制資用貨實固啓于貪冒之源有司不禁侈俗滋扇蓋朕教導之未敷使兆庶昧於恥尚也其何以足用行令臻于致理歟永念慙歎迨茲申勅自今内外班列職位之士各務素朴弘茲國風有僭差尤甚者御史糾上主者宣示知朕意焉文宗承長慶寶曆奢靡之風銳意懲革躬行儉素以率厲之辛未以前東都留守崔弘禮爲刑部尚書鎮州王廷湊請脩建初啓運二陵從之五月甲戌朔

丁丑以旱命京城諸司䟽理繫囚已卯通化南北二門鑰不可開鑰  
入如有持之者上令鐵工破鑰時日已及辰矣丁亥改鄆州東平縣  
爲天平縣戊子勅度支每歲於西川織造綾羅錦八千一百六十七  
匹令數內減二千五百十四匹六月癸卯朔丁未以守司徒門下侍郎  
平章事上柱國開國公食邑三千戶食實封三百戶裴度爲守司徒  
平章軍國重事待疾損日每三日五日一度入中書辛未夜自三更  
至五更大小星流旁午觀者不能數壬申詔如聞諸司刑獄例多停  
滯委尚書左右丞及監察御史糾舉以聞秋七月癸酉朔癸未詔以  
朝議郎尚書右丞上柱國賜紫金魚袋宋申錫爲正議大夫行尚書  
右丞同中書門下平章事乙酉勅前行郎中知制誥者約滿一周年  
即與正授從諫議大夫知者亦宜準此餘依長慶二年七月二十七  
日勅處分振武置雲伽關加鎮兵千人以吏部侍郎王播爲京兆尹  
兼御史大夫代李諒爲桂管觀察使太原飢賑粟三萬石賜十六宅  
諸王綾絹二萬匹丁酉守司徒裴度上表辭冊命言臣此官已三度

受冊有醜面目從之八月壬寅朔丙辰鄜州水溺居民三百餘家太原柳公綽奏雲代蔚三州山谷間石化爲麪人取食之己未宣歙觀察使于敖卒甲子內出綾絹三十萬匹付戶部充和糴戊辰幸梨園亭會昌殿奏新樂九月壬申朔丁丑以大理卿裴誼檢校右散騎常侍充江西觀察使代沈傳師以傳師爲宣歙觀察使內出綾三千匹賜宥州築城兵士戊寅舒州太湖宿松望江三縣水溺民戶六百八十詔以義倉賑貸庚辰吏部尚書王涯爲右僕射依前鹽鐵轉運使壬午以守司徒平章軍國重事晉國公裴度守司徒兼侍中充山南東道節度使以投來奚王茹羯爲右驍衛將軍同正丙戌以前山南東道節度使竇易直爲尚書左僕射戊子吏部尚書致仕裴向卒己丑淮南天長等七縣水害稼丁酉前豐州刺史天德軍使渾瑊坐賊七千貫貶袁州司馬冬十月壬寅朔戊申以東都畱守崔元略檢校吏部尚書兼滑州刺史義成軍節度使代李德裕以德裕檢校兵部尚書兼成都尹充劍南西川節度使己酉京師有熊入莊嚴寺庚戌

以前刑部尚書崔弘禮爲東都畱守田寅以前劍南西川節度使檢校司空郭釗爲太常卿代崔群爲吏部尚書丁卯御史中丞宇文鼎奏今月十三日宰臣宣旨今後羣臣延英奏事前一日進狀入來者臣以尋常公事不暇面論但見表章足以陳露儻臨時忽有公務文字不足盡言則咫尺天聽無路聞達更俟後坐動踰數辰處置之間便有不及伏乞重賜宣示限以狀入者並在卯前如在卯後聽不收覽自然人各遵守禮亦得中從之十一月辛未朔是夜焚惑近左執法癸巳以左丞康承宣爲充海沂密等州節度使淮南大水及蟲霜並傷稼十二月辛丑朔滄州殷侑請廢景州爲景平縣己酉義成軍節度使崔元略卒壬子以左金吾衛大將軍段凝爲義成軍節度使癸丑湖南觀察使韋詞卒丙辰以工部侍郎崔瑄爲京兆尹代王播爲尚書左丞癸亥東都畱守崔弘禮卒以同州刺史高重爲潭州刺史兼御史中丞充湖南觀察使甲子左僕射致仕楊於陵卒贈司空丙寅以前河南尹馮宿爲工部侍郎戊辰以太子賓客分司白居易

爲河南尹以代韋弘景以弘景守刑部尚書東都留守閏十二月辛未朔壬申太常卿郭釗卒贈司徒壬辰廢齊州歸化縣地入臨邑縣廢景州其縣隸滄州刺史是歲京畿河南江南荆襄鄂岳湖南等道大水害稼出官米賑給

五年春正月庚子朔以積陰浹旬罷元會丁巳賜滄德節度使曰義昌軍太原旱賑粟十萬石己未詔方鎮節度觀察使請入覲者先上表奏聞候允則任進程庚申幽州軍亂逐其帥李載義立後院副兵馬使楊志誠爲留後癸亥詔端午節辰方鎮例有進奉其雜綵匹段許進生白綾絹己丑以權知渤海國務大彝震檢校秘書監忽汗州都督渤海國王二月庚午朔壬辰以盧龍軍節度使守太保同平章事李載義守太保同中書門下平章事時載義失守入朝賜第於永寧里給賜優厚丙申以桂管觀察使李諒爲嶺南節度使戊戌神策中尉王守澄奏得軍虞候豆盧著狀告宰相宋申錫與漳王謀反即令追捕庾子詔貶宋申錫爲太子右庶子壬寅左常侍崔玄亮及諫官等

十四人伏奏王階北軍所告事請不於內中鞫問乞付法司帝曰吾已謀於公卿矣卿等且退崔玄亮泣涕陳諫久之帝改容勞之曰朕即與宰臣商議玄亮等方退癸卯詔漳王湊可降爲巢縣公左庶子宋申錫開州司馬同正初京師凶凶以宰相實聯親王謀逆三四日後方知誣搆人士側目於守澄鄭注故諫官號泣論之申錫方免其禍已酉勅以李載義入朝於曲江亭賜宴仍命宰臣百寮赴會辛酉以黔中觀察使裴弘恭爲桂管經畧使以前安州刺史陳正儀爲黔中觀察使丁卯紫宸奏事宰相隨至龍墀身仆于地令中人掖之翌日上䟽陳退識者嘉之夏四月己巳朔甲戌以新羅王嗣子金景徽爲開府儀同三司檢校太保使持節鷄林州諸軍事鷄林州大都督寧海軍使上柱國封新羅王仍封其母朴氏爲新羅國太妃丁亥詔史官記事用戒時常朝舊制並得隨仗其後宰臣撰時政記因循斯久廢墜實多自今後宰臣奏事有關獻替及臨時處分稍涉政刑者委中書門下丞一人隨時撰錄每季送史館庶警朕闕且復官常

已丑以李載義爲山南西道節度依前守太保同平章事代溫造以  
造爲兵部侍郎以幽州盧龍節度畱後楊志誠檢校工部尚書爲幽  
州盧龍節度使五月戊戌朔太廟第四室第六室破漏有司不時脩  
葺各罰俸上命中使領工徒及以禁中脩營材葺之右補闕韋溫上  
疏論曰宗廟不葺罪在有司弛慢宜加重責今有司止於罰俸便委  
內臣葺脩是許百司之官公然廢職以宗廟之重爲陛下所司則群官  
有司便同委棄此臣竊爲聖朝惜也事關宗廟皆書史冊苟非舊典  
不可率然伏乞更下詔書復委所司管葺則制度不紊官業各脩矣  
疏奏帝嘉之乃追止中使命有司脩奉戊午西川李德裕奏南蠻放  
還先虜掠百姓工巧僧道約四千人還本道辛酉東都畱守刑部尚  
書韋弘景卒丙寅以京兆尹崔瑄爲尚書左丞太常少卿龐嚴權知  
京兆尹六月丁卯朔戊寅以霖雨涉旬詔䟽理諸司繫囚辛卯蘇杭  
湖南水害稼甲午東川奏玄武江水漲二丈梓州羅城漂人廬舍秋  
七月丁酉朔庚子贈太子賓客李渤禮部尚書辛丑以兵部侍郎溫



造檢校戶部尚書爲東都留守甲辰以太子少師分司上柱國襲徐國公蕭儁守左僕射致仕劔南東西兩川水遣使宣撫賑給己未以給事中羅讓爲福建觀察使八月丙寅朔庚午武昌軍節度使檢校戶部尚書元稹卒辛未貶刑部員外郎舒元興爲著作郎元興累上表請自效并進文章朝議責其躁進也壬申以河陽三城懷州節度使楊元卿爲宣武軍節度使代李逢吉以逢吉檢校司徒兼太子太師充東都留守代溫造以溫造爲河陽三城懷州節度使戊寅以陝虢觀察使崔郾爲鄂岳安黃觀察使甲申以中書舍人崔咸爲陝州防禦使詔陝州舊有都防禦觀察使額宜停兵馬屬本州防禦使丙戌京兆尹龐嚴卒庚寅以司農卿駙馬都尉杜棕爲京兆尹九月丙申朔甲辰貶太子左庶子郭求爲婺王府司馬以其心疾與同寮忿競也翰林學士薛廷老李讓夷皆罷職守本官廷老在翰林終日酣醉無儀檢故罷讓夷常推薦廷老故坐累也已未以左僕射竇易直判太常卿西川李德裕奏收復吐蕃所陷維州差兵鎮守冬十月乙丑

朔以前綿州刺史鄭綽爲安南都護戊寅蠻寇雋州陷二縣辛巳滄  
州移清池縣於南羅城內置十一月乙未朔庚戌鳳翔節度使王承  
元來朝已未以承元檢校司空青州刺史充平盧軍節度使癸亥以  
尚書左僕射判太常卿事竇易直檢校司空爲鳳翔隴右節度使十  
二月乙丑朔戊寅以左丞王播兼判太常卿事甲申貶新除桂管觀  
察使裴弘泰爲饒州刺史以除鎮淹程不進爲憲司所糾故也癸巳  
以鄭州刺史李翱爲桂管觀察使是歲淮南浙江東西道荆襄鄂岳  
南東川並水害稼請蠲秋租是冬京師大雨雪

六年春正月乙未朔以久雪廢元會戊戌振武李沐招收得黑山外  
契苾部落四百七十三帳壬子詔朕聞天聽自我人聽天視自我人  
視朕之菲德涉道未明不能調序四時導迎和氣自去冬已來踰月  
雨雪寒風尤甚頗傷于和念茲廢畋或罹凍餒無所假貸莫能自存  
中宵載懷旰食興歎怵惕若厲時予之辜思弘惠澤以順時令天下  
死罪囚除官典犯賊故意殺人外并降徒流流已下遞降一等應京

畿諸縣宜令以常平義倉斛斗賑恤京城內鰥寡瘵殘無告不能自  
存者委京兆尹量事濟恤具數以聞言念赤子視之如傷天或警予  
示此陰沴撫躬夕惕予甚悼焉羣臣拜表上徽號甲寅司徒致仕薛  
平卒二月甲子朔以前義昌軍節度使殷侑檢校吏部尚書充天平  
軍節度鄆曹濮等州觀察使代令狐楚以楚檢校右僕射兼太原尹  
北都畱守河東節度使戊寅蘇湖二州水賑米二十二萬石以本州  
常平義倉斛斗給庚辰戶部尚書判度支王起請於邠寧靈武置營  
田務從之己丑寒食節上宴羣臣於麟德殿是日雜戲人弄孔子帝  
曰孔子古今之師安得侮瀆亟命驅出三月甲午朔辛丑以武寧軍  
節度使守太傅同平章事王智興兼侍中充忠武軍節度陳許蔡觀  
察等使以邠寧節度使李聽爲武寧軍節度徐泗濠觀察等使以金  
吾衛大將軍孟友亮爲邠寧節度使以前河東節度使柳公綽爲兵  
部尚書辛酉以前忠武軍節度使高瑀檢校右僕射充武寧軍節度  
徐泗濠觀察等使夏四月癸亥朔乙丑兵部尚書柳公綽卒戊寅以

新除武寧軍節度使李聽爲太子太保五月癸巳朔甲辰西川修平  
峽關城又移雋州於臺登城壬子浙西丁公著奏杭州八縣災疫賑  
米七萬石丁巳以鹽州刺史王晏平檢校左散騎常侍御史大夫充  
靈鹽節度使已未興平縣人上官興因醉殺人而亡竄官捕其父囚  
之興歸罪有司京兆尹杜棕中丞宇文鼎以興自首免父之囚其孝  
可獎請免死詔兩省叅議皆言殺人者死古今共守興不可免上竟  
從棕等議免死決杖八十配流靈州庚申詔如聞諸道水旱害人疾  
疫相繼宵旰罪已興寢疚懷今長史奏申札瘥猶甚蓋教化未感於  
蒸人精誠未格於天地法令或爽官吏爲非有一於茲皆傷和氣並  
委中外臣寮一一具所見聞奏朕當親覽無憚直言其遭災疫之家一  
門盡歿者官給凶器其餘據其人口遭疫多少與減稅錢疫疾未定  
處官給醫藥諸道既有賑賜國費復慮不充其供御所須及諸公用  
量宜節減以救凶荒六月壬戌朔丙寅京兆尹杜棕兼御史大夫戊  
寅右僕射王涯奉勅准令式條疏士庶衣服車馬第舍之制度勅下

後浮議沸騰杜棕於勅內條件易施行者寬其限事竟不行公議惜之秋七月辛卯朔甲午以諫議大夫王彥威戶部郎中楊漢公祠部員外郎蘇滌右補闕裴休並充史館修撰故事史官不過三員或止兩員今四人並命論者非之戊申原王遼薨癸丑以前靈武節度使李文悅爲充海沂密節度使己未以河中節度使李程爲左僕射以戶部尚書判度支王起檢校吏部尚書充河中晉磁隰節度使以御史中丞兼刑部侍郎宇文鼎爲戶部侍郎判度支八月辛酉朔吏部尚書崔羣卒以駕部郎中知制誥李漢爲御史中丞乙丑以尚書右丞判太常卿王璠檢校禮部尚書潤州刺史浙西觀察使庚午山南東道節度使裴度來朝壬申以前浙西觀察使丁公著爲太常卿甲戌御史中丞李漢奏論僕射上事儀不合受四品已下官拜時左僕射李程將赴省上故也詔曰僕射上儀近定所緣拜禮皆約令文已經施行不合更改宜準太和四年十一月十六日勅處分九月庚寅朔淄青初定兩稅額五州一十九萬三千九百八十九貫自此淄青

始有上供庚子以太傅趙宗儒守司空致仕辛丑涿州置新城縣古督亢之地也丁未太常卿丁公著卒庚戌司空致仕趙宗儒卒壬子以右金吾衛將軍史孝章爲鄆州刺史鄆坊丹延節度使冬十月庚子朔甲子詔魯王永宜冊爲皇太子壬午以左金吾衛將軍李昌言檢校左散騎常侍充夏綏銀宥節度使甲申以諫議大夫王彥威爲河中少尹以其論上官興獄太微訐故也十一月己丑朔丁未淮南節度使檢校右僕射崔從卒乙卯以荆南節度使段文昌爲劔南西川節度使依前檢校左僕射同平章事十二月己未朔乙丑以中書侍郎同平章事牛僧孺檢校右僕射同平章事揚州大都督府長史充淮南節度使戊辰內養王宗禹渤海使迴言渤海置左右神策軍左右三軍一百二十司畫圖以進以尚書右丞崔瑄爲江陵尹荆南都團練觀察使珍王誠薨乙亥昭義節度使劉從諫來朝丁未以前西川節度使李德裕爲兵部尚書責授循州司戶杜元穎卒贈湖州刺史

七年春正月乙丑朔御含元殿受朝賀比年以用兵雨雪不行元會之儀故書吳蜀貢新茶皆於冬中作法爲之上務恭儉不欲逆其物性詔所供新茶宜於立春後造甲午加劉從諫同平章事襄州裴度奏請停臨漢監牧從之此監元和十四年置馬三千二百匹廢百姓田四百餘頃停之爲便乙亥以太府卿崔珙爲廣州刺史嶺南節度使壬子詔朕承上天之睠佑荷列聖之不圖宵旰憂勞不敢暇逸思致康乂八年于茲而水旱流行疫疾作沴北庶艱食札瘥相仍蓋德未動天誠未感物一類失所其過在予載懷罪己之心深軫納隍之歎如聞關輔河東去年亢旱秋稼不登今春作之時農務又切若不賑救懼至流亡京兆府賑粟十萬石河南府河中府絳州各賜七萬石同華陝虢晉等州各賜十萬石並以常平義倉物充以新除嶺南節度使崔珙檢校工部尚書充武寧軍節度使以右金吾衛將軍王茂元爲嶺南節度使丙辰以前武寧軍節度使高瑀爲刑部尚書嶺南五管及黔中等道選補使宜權停一二年二月己未朔己巳以吏

部侍郎庾承宣爲太常卿癸酉以宗正卿李詵爲陝州防禦使代崔  
咸以咸爲右散騎常侍己卯麟德殿對吐蕃渤海牂牁昆明等使辛  
巳御史臺奏均王傳王堪男禎國忌日於私第科決罰人詔曰準令  
國忌日禁飲酒舉樂決罰人吏都無明文起今後從有此類不須舉  
奏王禎宜釋放丙戌詔以銀青光祿大夫守兵部尚書上柱國贊皇  
縣開國伯食邑七百戶李德裕以本官同中書門下平章事三月戊  
子朔庚寅以前戶部侍郎楊嗣復爲尚書左丞壬辰以左散騎常侍  
張仲方爲太子賓客分司仲方爲郎中時常駁故相李吉甫諡德裕  
秉政仲方請告因授之己亥嶺南節度使李諒卒辛丑和王綺薨復  
於埴橋置宿州割徐州符離縣蘄縣泗州虹縣隸之以東都鹽鐵院  
官吳季直爲宿州刺史癸卯以京兆尹駙馬都尉杜棕檢校禮部尚  
書充鳳翔隴右節度己酉安南奏蠻寇當管金龍州當管生獠國赤珠  
落國同出兵擊蠻敗之庚戌出給事中楊虞卿爲常州刺史中書舍  
人張元夫汝州刺史以太府卿韋長爲京兆尹丙辰以散騎常侍嚴



休復爲河南尹丁巳以給事中蕭幹爲鄭州刺史夏四月戊午朔辛酉九姓迴紇可汗卒癸亥前鳳翔節度使檢校司空竇易質卒癸酉以同州刺史吳士智爲江西觀察使以吏部侍郎高鉞爲同州刺史庚辰以工部侍郎李固言爲右丞中書舍人楊汝士爲工部侍郎壬子以河南尹白居易爲太子賓客分司東都甲申以江西觀察使裴誼爲歙池觀察使代沈傳師以傳師爲吏部侍郎以右金吾衛將軍唐弘實使迴紇冊九姓迴紇愛登里羅汨沒使合句錄毗伽彰信可汗五月丁亥朔丁酉以李聽爲鳳翔隴右節度使依前檢校司徒兼太子太保癸卯興元李載義來朝癸丑以前邛州刺史劉旻爲安南都護六月丁巳朔乙巳以山南西道節度使李載義爲太原尹北都留守河東節度使依前守太保同平章事壬申以御史中丞李漢爲禮部侍郎以工部尚書翰林侍講學士鄭覃爲御史大夫甲戌以刑部尚書高瑀爲太子少保分司乙亥以中書侍郎平章事李宗閔檢校禮部尚書同平章事兼興元尹山南西道節度使丁丑以左金

吾衛將軍李從易爲桂管觀察使已卯以右神策大將軍李用爲邠寧節度使河陽脩防口堰役工四萬旣濟源河內溫縣武德武陟五縣田五千餘頃癸未涇原節度使張惟清卒乙酉以前河東節度使令狐楚檢校右僕射兼吏部尚書秋七月丙戌朔丁亥以右龍武統軍康志睦爲四鎮北庭行軍涇原節度使壬寅以金紫光祿大夫守尚書右僕射諸道鹽鐵轉運使上柱國代郡公食邑二千戶王涯可同中書門下平章事領使如故甲辰右丞李固言等奏狀論僕射省中上事不合受四品已下拜勅旨宜準大和四年十一月十六日勅處分乙巳號州刺史崔玄亮卒以左承楊嗣復檢校禮部尚書充劔南東川節度使以戶部侍郎庾敬休爲左丞已酉以旱命京城諸司䟽決繫囚壬子勅應任外官帶一品正京官者縱不知政事其俸料宜兼給癸丑以左僕射李程檢校司空兼汴州刺史宣武軍節度使甲寅以旱徙市左降官開州司馬宋申錫卒詔許歸葬閏七月乙卯朔詔曰朕嗣守不圖覆軀生類兢業寅畏上承天休而陰陽失和膏澤愆

候害我稼穡災于黔黎有過在予敢忘咎責從今避正殿減供膳停教坊樂廐馬量減芻粟百司厨饌亦宜權減陰陽鬱堙有傷和氣宜出宮女千人五坊鷹犬量須減放內外脩造事非急務者並停時久無雨上心憂勞詔下數日雨澤霑洽人心大悅乙丑以前宣武軍節度楊元卿爲太子太保戊戌以給事中崔戎爲華州刺史癸未以太子賓客李紳檢校左散騎常侍兼越州刺史充浙東觀察使代陸亘以亘爲宣歙觀察使八月甲申朔御宣政殿冊皇太子永是日降詔應犯死降徒流流已下遞減一等諸王自今年後相次出閣授緊望已上州刺史佐其十六宅諸縣主委吏部於選人中簡擇配匹具以名聞皇太子方從師傅傳授六經一二年後當令齒胄國庠以興隆典宜令國子選名儒宜五經博士各一人其公卿士族子弟明年已後不先入國學習業不在應明經進士限其進士舉宜先試帖經并略問大義取經義精通者放及第卿大夫者下人之所視遠方之所倣若非恭儉克己廉直任人而望其服從固不可得况朕不寶珠玉

不御纖華逮于六宮皆務儉薄卿大夫得不叶朕此志率先兆人比  
年所頒制度皆約國家令式去其甚者稍謂得中而士大夫苟自便  
身安於習俗因循未革以至于今百官士族起今年十月其衣服輿  
馬並宜準太和六年十月七日勅如有固違重加黜責文武常叅官  
及諸州府長官子爲父後者賜勲兩轉癸巳太子太保楊元卿卒戊  
申以京兆尹韋長兼御史大夫以刑部尚書高瑀爲忠武軍節度使  
九月甲寅朔丙寅侍御史李欵閣內奏彈前邠州行軍司馬鄭注曰  
注內通勅使外連朝官兩地往來卜射財貨晝伏夜動干竊化權人  
不敢言道路以目請付法司推劾續旬日之中諫章數十上由是授  
注通王府司馬兼侍御史充神策軍判官中外駭歎甲寅以前忠武  
軍節度使王智興依前守太傅兼侍中河中尹河中晉絳慈隰節度  
使代王起以起爲兵部尚書冬十月癸未朔揚州江都等七縣水害  
稼壬辰上降誕日僧徒道士講論於麟德殿翌日御延英上謂宰臣曰  
降誕日設齋起自近遠朕緣相承已久未可便革雖置齋會唯對王

源中等暫入殿至僧道講論都不臨聽宰相路隨等奏誕日齋會誠  
資景福本非中國教法臣伏見開元十七年張說源乾曜請以誕日  
爲千秋節內外宴樂以慶昌期頗爲得禮上深然之宰臣因請十月  
十日爲慶成節上誕日也從之辛酉潤常蘇湖四州水害稼十一月  
癸丑朔乙亥涇原節度使康志睦卒已卯以左神策長武城使朱叔  
夜爲涇州刺史充涇原節度使壬午於銀州置監牧十二月癸未朔  
巳亥刑部詳定大理丞謝登新編格後勅六十卷令刪落詳定爲五  
十卷庚子幸望春宮聖體不康癸卯天平軍節度檢校司空王承元  
卒丁未以河南尹嚴休復檢校禮部尚書充平盧軍節度淄青登萊  
棣觀察等使戊申以給事中王質權知河南尹以河東節度副使李  
石爲給事中

八年春正月癸丑朔丁巳聖體痊平御太和殿見內臣甲子御紫宸  
殿見群臣丙寅脩太廟令太常卿庾承宣攝太尉徧告九室遷神主  
於便殿癸酉揚楚舒廬壽滁和七州去年水損田四萬餘頃二月壬

午朔日有蝕之庚寅詔以聖躬痊復赦繫囚放逋賦移流人已亥蔚  
州飛狐鎮置鑄錢院三月壬子朔甲寅上已賜群臣宴於曲江亭庚  
午以山南東道節度使裴度充東都留守依前守司徒兼侍中以東  
都留守李逢吉檢校司徒兼右僕射癸酉充海節度使李文悅卒丙  
子以右承李固言爲華州刺史代崔戎以戎爲充海觀察使四月壬  
午朔壬辰集賢學士裴潏撰通選三十卷以擬昭明太子文選潏所  
取偏僻不爲時論所稱甲午以宿州刺史吳季真爲豈管經略使乙  
巳翰林學士兵部侍郎王源中辭內職乃以源中爲禮部尚書五月  
辛亥朔己巳脩奉太廟畢以吏部尚書令狐楚攝太尉偏告神主復  
正殿飛龍神駒中廐火六月庚辰朔辛巳徙市壬午大理卿劉遵古卒  
壬辰陳許節度使高瑀卒甲午以旱詔諸司䟽決繫囚丙申以前鳳  
翔節度使駙馬都尉杜棕起復檢校戶部尚書充忠武軍節度使戊  
戌宰臣王涯路隨奏請依舊制讀時令庚子充海觀察使崔戎卒辛  
丑同州刺史高鉞卒戊申以將作監駙馬都尉崔杞爲充海沂密觀

察使秋七月庚戌朔丙辰以工部侍郎楊汝士爲同州刺史戊午奉  
先美原櫟陽等縣雨損夏麥辛酉定陵臺大雨震東廊廊下地裂一  
百三十尺詔宗正卿李仍叔啓告脩塞癸亥覃王經薨己巳夜月犯  
昴壬申以右金吾衛大將軍段百倫檢校工部尚書充福建觀察使  
堂帖中外臣寮各舉善周易學者八月己卯朔右龍武統軍董重質  
卒庚寅太白犯熒惑辛卯詔故澧王大男漢可封東陽郡王第二男  
源可封安陸郡王第三男演可封臨川郡王故深王大男潭可封河  
內郡王第二男淑可封吳興郡王故絳王大男洙可封新安郡王第  
二男滂可封高平郡王故淑王大男湧可封潁川郡王溜王大男幹  
可封許昌郡王沔王大男瀛可封晉陵郡王祁王大男溥可封平陽  
郡王仍並賜光祿大夫丙申罷諸色選舉歲旱故也己亥御寫周易  
義五道示群臣有人明此義者三日內聞奏時李仲言以易道惑上  
及下其義人皆竊笑卒無進言者九月乙酉朔辛亥夜彗起太微近  
卽位西指長丈餘西北行凡九夜越卽位西北五尺減癸丑月入南

斗乙亥宣州觀察使陸亘卒己未宰臣李德裕進御臣要略及柳氏  
舊聞三卷隨州刺史杜師仁前刺吉州坐贓計絹三萬匹賜死于家  
故江西觀察使裴誼垂於廉察削所贈工部尚書庚申右軍中尉王  
守澄宣召鄭注對于浴堂門仍賜錦彩銀器是夜彗出東方長三尺  
輝耀甚偉辛酉以權知河南尹王質爲宣歙觀察兼部尚書致仕張  
正甫卒癸亥以尚書吏部侍郎鄭澣爲河南尹甲子鄭注進藥方一  
卷庚午安王溶穎王瀍皆檢校兵部尚書宰相路隨冊拜太子太師  
辛巳幽州節度使楊志誠監軍李懷件悉爲三軍所逐立其部將史  
元忠爲留後陝州江西旱無稼己丑秘書監崔威卒庚寅以山南西  
道節度使檢校禮部尚書同平章事上柱國襄武縣開國侯食邑一  
千戶李宗閔可中書侍郎同中書門下平章事辛卯以中使田全操  
充皇太子見太師禮儀使召國子四門助教李仲言對於思政殿賜  
緋河南府鄧州同州揚州並秦旱蟲傷損秋稼甲午以銀青光祿大  
夫守中書侍郎平章事李德裕檢校兵部尚書同平章事興元尹充



山南西道節度使以助教李仲言爲國子周易博士充翰林侍講學士皇太子見太師路隨於崇明門丙申諫官上疏論李仲言不合獎任上令中使宣諭諫官曰朕畱仲言禁中顧問經義勅命已行不可遽改淮南兩浙黔中水爲災民戶流亡京師物價暴貴庚子詔鄭注對於太和殿以御史大夫鄭覃爲戶部尚書壬寅翰林院宴李仲言賜法曲弟子二十人奏樂以寵之丙午以新除興元節度使李德裕爲兵部尚書十一月丁未朔庚戌以尚書左僕射致仕蕭俛爲太子太傅辛亥以左金吾衛大將軍蕭洪爲河陽三城節度使襄州水損田壬子滁州奏清流等三縣四月雨至六月諸山發洪水漂溺戶萬三千八百癸丑以禮部尚書王源中檢校戶部尚書充山南西道節度使以戶部侍郎李漢爲華州刺史鎮國軍潼關防禦使成德軍節度使王廷湊卒以前揚州節度使溫造爲御史大夫己卯幽州節度使楊志誠被逐入朝下御史臺訊鞫志誠在幽州被服皆爲龍鳳乃流之嶺外至商州殺之乙亥以兵部尚書李德裕檢校右僕射充鎮

海軍節度浙江西道觀察等使丙子李仲言奏請改名訓從之十二月丁丑朔己卯以昭義節度副使檢校庫部員外郎賜紫金魚袋鄭注爲太僕卿辛巳以棣州刺史韓威爲安南都護癸未以通王爲幽州盧龍節度使以權勾當幽州兵馬史元忠爲畱後甲申許太子太傅蕭俛致仕是夜月掩昴己丑以太子賓客分司張仲方爲左散騎常侍常州刺史楊虞卿爲工部侍郎己亥以尚書左僕射李逢吉守司徒致仕以宗正卿李仍叔爲湖南觀察使代李翱以翱爲刑部侍郎代裴潏以潏爲華州鎮國軍潼關防禦使昭成寺火

九年春正月丁未朔己卯以鎮州左司馬王元逵起復定遠將軍守左金吾衛大將軍檢校工部尚書充成德軍節度使鎮冀深趙觀察等使以太常卿庾承宣檢校吏部尚書充天平軍節度使代殷侑以侑爲刑部尚書癸亥巢縣公湊薨追封齊王壬申司徒致仕李逢吉卒癸酉以右散騎常侍舒元興爲陝州防禦觀察使以前棣州刺史田早爲安南都護二月丙子朔甲申以司農卿王彥威兼御史大夫充

平盧軍節度使丁亥發神策軍一千五百人脩淘曲江如諸司有力  
要於曲江置亭館者宜給與閑地辛丑冀王綽薨癸卯京師地震甲  
辰以幽州留後史元忠爲盧龍節度使乙巳劍南節度使西川檢校  
左僕射同平章事段文昌卒庚申以劍南東川節度使楊嗣復檢校  
戶部尚書兼成都尹西川節度使乙丑以歲饑河北尤甚賜魏博六  
州粟五萬石陳許鄆曹濮三鎮各賜糙米二萬石庚午左丞庾敬休  
卒廢朝一日詔曰官至丞郎朕所親委不幸云亡者宜爲之廢朝自  
今丞郎宜準諸司三品官例罷朝一日夏四月丙子朔丙戌以桂管  
觀察使李從易爲廣州刺史嶺南節度使以鎮海軍節度使浙西觀  
察等使李德裕爲太子賓客分司東都辛卯以京兆尹賈餗爲浙  
西觀察使以工部侍郎楊虞卿爲京兆尹仍賜金紫以給事中韓伋  
爲桂管觀察使丙申以太子太師門下侍郎平章事路隋爲鎮海軍  
節度浙西觀察等使戊戌詔以新浙西觀察使賈餗爲中書侍郎同  
中書門下平章事庚子詔銀青光祿大夫守太子賓客分司東都上

柱國贊皇縣開國伯食邑七百戶李德裕貶袁州長史辛丑大風含  
元殿四鴟吻並皆落壤金吾仗舍廢樓觀城四十餘所壬寅吏部  
侍郎沈傳師卒五月乙巳朔丁未以浙東觀察使李紳爲太子賓客  
分司東都乙卯以給事中高銖爲浙東觀察使戊午以御史大夫溫  
造爲禮部尚書以吏部侍郎李固言爲御史大夫辛酉太和公主進  
馬射女子七人沙陀小兒二人戊辰以金吾大將軍李玘爲黔中觀  
察使以尚書右丞王璠爲戶部尚書判度支己巳以戶部尚書鄭覃  
爲秘書監辛未宰相王涯冊拜司空癸酉以河中節度使王智興爲  
宣武軍節度使依前守太傅兼侍中六月乙亥朔西市火以前宣武  
軍節度使李程爲河中節度使庚寅夜月掩歲癸巳以吏部尚書令  
狐楚爲太常卿丁酉禮部尚書溫造卒京兆尹楊虞卿家人出妖言  
下御史臺虞卿弟司封郎中漢公并男知進等八人擣登聞鼓稱冤  
勅虞卿歸私第己亥以右神策大將軍劉沔爲涇原節度使壬辰詔  
以銀青光祿大夫守中書侍郎同平章事襄武縣開國侯食邑一千

戶李宗閔貶明州刺史時楊虞卿坐妖言人歸第人皆以爲寃誣宗  
閔於上前極言論列上怒面數宗閔之罪叱出之故坐貶秋七月甲  
申朔貶京兆尹楊虞卿爲虔州司馬同正丙午以給事中李石權知  
京兆尹戊申填龍首池爲鞠場曲江脩紫雲樓辛亥詔以御史大夫  
李固言爲門下侍郎同平章事壬子再貶李宗閔爲虔州長史癸丑  
以右司郎中兼侍御史知雜事舒元興爲御史中丞貶吏部侍郎李  
漢爲邠州刺史刑部侍郎蕭幹爲遂州刺史丁巳詔不得度人爲僧  
尼戊午貶工部侍郎充皇太子侍讀崔侑爲洋州刺史貶吏部郎中  
張諷夔州刺史考功郎中皇太子侍讀蘇滌忠州刺史戶部郎中楊  
敬之連州刺史辛酉以鄂岳觀察使崔郾充浙西觀察使以國子祭  
酒高重爲鄂岳觀察使壬戌鎮海軍節度使路隨卒癸亥貶侍御史  
李甘爲封州司馬殿中侍御史蘇特爲潘州司戶甲子以周易博士  
李訓爲兵部郎中知制誥依前充翰林侍講李士丁卯天平軍節度  
使庾承宣卒以大理卿羅讓爲散騎常侍以汝州刺史郭行餘爲大

理卿戊辰以刑部尚書殷侑爲天平軍節度使以吉州刺史裴泰爲  
豈管經略使八月甲戌朔以戶部侍郎李翱檢校禮部尚書充山南  
東道節度使代王起以起爲兵部尚書判戶部事丙子又貶虔州長  
史李宗閔爲潮州司戶丁丑以太僕卿鄭注爲工部尚書充翰林侍  
講學士上幸左軍龍首殿因幸梨園含元殿大合樂戊寅以秘書監  
鄭覃爲刑部尚書貶翰林學士守尚書戶部侍郎知制誥李珣爲江州  
刺史以鄜坊節度使李章爲義成軍節度使甲申以左神策軍大將  
軍趙儋爲鄜坊節度使甲午貶中書舍人權璩爲鄭州刺史丙申內  
官楊承和於權州安置韋元素象州安置王踐言思州安置仰錮身  
遞送言李宗閔爲吏部侍郎時託駙馬沈巖於官人宋若憲處求宰  
相承和踐言元素居中導達故也宗閔黨楊虞卿李翰蕭澣皆再貶  
壬寅貶中書舍人高元裕爲閬州刺史元裕爲鄭注除官制說注醫  
藥之功注銜之故也以蘇州刺史盧周仁爲河南觀察使九月癸卯  
朔奸臣李訓鄭注用事不附已者即時貶黜朝廷悚震人不自安是

日下詔曰朕承天之序燭理未明勞虛襟以求賢勵寬德以容衆頃者台輔乖弼諧之道而具寮翦朋比之風翕然相從實數曩憲致使薰蕕共器賢不肖並馳退迹者咸後時之夫登門者有迎吠之客繆鑿之氣堙鬱未平而望陰陽順時疢癘不作朝廷清肅班列和安自古及今未嘗有也今既再申朝典一變澆風掃清朋附之徒匡飭貞廉之俗凡百卿士惟新令猷如聞周行之中尚蓄疑懼或有妄相指目令不自安今茲曠然明喻朕意應與宗閔德裕或新或故及門生舊吏等除今日已前放黜之外一切不問辛亥以太子賓客分司東都白居易爲同州刺史代楊汝士以汝士爲駕部侍郎乙亥以涇原節度使劉沔爲振武麟勝節度使丙辰以權知御史中丞舒元興爲御史中丞兼判刑部侍郎庚申以鳳翔節度使李聽爲忠武軍節度使癸亥令內養齊抱眞將杖於清泥驛決殺前襄州監軍陳弘志以有弒逆之罪也丁卯以門下侍郎同平章事李固言爲興元尹山南西道節度使以翰林侍講學士工部尚書鄭注檢校右僕射充鳳翔

離右節度使戊辰以右軍中尉王守澄爲左右神策觀軍容使兼十二  
衛統軍已巳詔以朝議郎守御史中丞兼刑部侍郎賜紫金魚袋舒  
元興本官同中書門下平章事朝議郎守兵部郎中知制誥充翰林  
侍講學士賜緋魚袋李順可守尚書禮部侍郎同中書門下平章事  
仍賜金紫壬申以刑部郎中兼侍御史知雜李孝本權知御史中丞  
冬十月癸酉朔乙亥杜悰復爲陳許節度使李聽爲太子太保分司  
內出曲江新造紫雲樓彩霞亭額左軍中尉仇士良以百戲於銀臺  
門迎之時鄭注言秦中有災宜興土功厭之乃濬昆明曲江二池上  
好爲詩每誦杜甫曲江行云江頭宮殿鎖千門細柳新蒲爲誰綠乃  
知天寶已前曲江四岸皆有行宮臺殿百司廨署思復昇平故事故  
爲樓殿以壯之王涯獻摧茶之利乃以涯爲摧茶使茶之有摧稅自涯始  
也京兆河南兩畿旱以吏部尚書令狐楚爲左僕射以刑部尚書鄭  
覃爲左僕射辛巳遣中使李好古齎醕賜王守澄是日守澄卒壬午  
賜羣臣宴於曲江亭癸未以前廣州節度使王茂元爲涇原節度使



丁亥禮部郎中錢可復兵部員外郎李敬彝駕部員外郎盧簡能主客員外郎蕭傑左拾遺盧茂弘等皆授鳳翔使府判官從鄭注奏請也乙未以新授同州刺史白居易爲太子少傅分司以汝州刺史劉禹錫爲同州刺史己亥以前河陽節度使蕭洪爲鄆坊節度使淄青觀察使王彥威請停管內縣丞一十九員從之庚子東都畱守特進守司徒侍中裴度進位中書令餘如故以前山南西道節度使王源中爲刑部尚書十一月壬寅朔乙巳令內養馮叔良殺前徐州監軍王守洎於中牟縣以左神策將軍胡沐爲容管經略使以大理卿郭行餘爲邠寧節度使丁未鄆坊節度使趙儋卒乙酉左金吾衛大將軍崔鄒卒癸丑以左僕射令狐楚判太常卿事右僕射鄭覃判國子祭酒事丁巳以戶部尚書判度支王璠爲太原尹北都畱守河東節度使戊午以京兆尹李石爲戶部侍郎判度支以京兆少尹羅立言權知府事己未以太府卿韓約爲左金吾衛大將軍壬戌中尉仇士良率兵誅宰相王涯賈餗舒元興李訓新除太原節度王璠郭行餘

鄭注羅立言李孝本韓約等十餘家皆族誅時李訓鄭注謀誅內官詐言金吾仗舍石榴樹有甘露請上觀之內官先至金吾仗見幕下伏甲遽扶帝輦入內故訓等敗流血塗地京師大駭旬日稍安癸亥詔以銀青光祿大夫尚書左僕射上柱國榮陽郡開國公鄭覃以本官同中書門下平章事乙丑詔以朝議郎守尚書戶部侍郎判度支李石可朝議大夫本官同平章事丁卯以左神策大將軍陳君奔爲鳳翔節度使戊辰以給事中李翊爲御史中丞左右軍中尉仇士良魚志弘並兼上將軍十二月壬申朔諸道鹽鐵轉運摧茶使令狐楚奏摧茶不便於民請停從之癸丑太子太保張茂宗卒甲子勅左右省起居齋筆硯及紙於螭頭下記言記事丙子以刑部尚書王源中爲天平軍節度使丁丑勅諸道府不得私置曆日板巳卯鳳翔監軍秦鄭注判官錢可復等四人並處斬訖庚辰上御紫宸謂宰相曰坊市之間人漸安未李石奏曰人情雖安然刑殺過多致此陰沴又聞鄭注在鳳翔招致兵募不少今皆被刑戮臣恐乘此生事切宜原赦

以安之上曰然鄭覃又陳理道上曰我每思貞觀開元之時觀今日之事往往憤氣填膺耳癸未儀仗使田全操巡邊迴馳馬入金光門街市訛言相驚縱橫散走賴金吾大將軍陳君賞以其徒立望仙門下至晚方定丁亥以權知京兆尹張仲方爲華州防禦使以司

農卿薛元賞權知京兆左僕射令狐楚奏方鎮節度使等具帑帑帶器仗就尚書省兵部叅辭伏乞停罷如須叅謝令具公服從之時楚引訓注奸謀用王璠郭行餘兵仗遂云不宜以兵仗入省叅辭殊乖事體也物議尤之先是宰相武元衡被害憲宗出內庫弓箭陌刀賜左右街使俟宰相入朝以爲翼從及建福門退至是亦停之辛卯置諫院印

開成元年正月辛丑朔帝常服御宣政殿受賀遂宣詔大赦天下改元開成乙巳御紫宸殿宰臣李石奏曰陛下改元御殿人情大悅全放京兆一年租賦又停四節進奉恩澤所該實當要切帝曰朕務行其實不欲崇長空文石曰敕書須內畱一本陛下時看之又十道黜

陟使發日更付與公事根本令向外與長吏詳擇施行方盡利害之  
要丁未以秘書監韋續爲工部尚書勅楊承和韋元素王踐言崔渾  
峻頃遭誣陷每用追傷宜復官爵聽其歸葬以銀州刺史劉源爲夏  
綏銀宥節度使丙辰望日有蝕之二月辛未朔以左散騎常侍羅讓  
爲江西觀察使乙亥夜四更京師地震屋瓦皆墮丙申左武衛大將  
軍朱叔夜賜死於藍田關天德奏生退渾部落三千帳來投豐州三  
月庚子朔壬寅以袁州長史李德裕爲滁州刺史庚申幸龍首池觀  
內人賽雨因賦暮春喜雨詩昭義節度使劉從諫三上疏問王涯罪  
名內官仇士良聞之惕懼是日從諫遣焦楚長入奏於客省進狀請  
面對上召楚長慰諭遣之夏四月庚午朔以河南尹鄭澣爲左丞以  
太子賓客分司東都李紳爲河南尹癸酉以亳州刺史裴弘泰爲義  
成軍節度使以諫議大夫李讓夷兼權知起居舍人事己卯以潮州  
司戶李宗閔爲衡州司馬以江州刺史李珣爲太子賓客分司癸未  
吏部侍郎李虞仲卒辛卯淄王協薨甲午詔以山南西道節度使檢

校兵部尚書李固言爲門下侍郎同中書門下平章事以左僕射諸道鹽鐵轉運使令狐楚檢校左僕射爲山南西道節度使丙申李固言判戶部事李石判度支兼諸道鹽鐵轉運使五月乙亥朔癸卯以翰林學士歸融爲御史中丞丁未以給事中郭承嘏爲華州防禦使給事中盧載以承嘏公正守道屢有封駁不宜置之外郡乃封還詔書朔日復以承嘏爲給事中乃以給事中盧鈞代嘏守華州乙卯御紫宸上謂宰臣曰爲政之道自古所難李石對曰朝廷法令行則易丁巳以尚書右丞鄭肅爲陝虢都防禦觀察使前罷觀察復置之以中書舍人唐扶爲福建觀察使庚申判國子祭酒宰臣鄭覃奏太學新置五經博士各一人請依王府官例賜以祿粟從之丙寅昭義奏開夷儀山路通太原晉州從之閏五月己巳朔甲申以河中節度使李程爲左僕射判太常卿事乙酉以太子太保分司李聽爲河中節度使丙戌烏集唐安寺逾月方訖己丑以神策大將軍魏仲卿爲朔方靈鹽節度湖南觀察使盧周仁進羨餘錢二萬貫雜物八萬段不

受還之使貸貧下戶征稅六月戊戌朔癸亥以河南尹李紳檢校禮部尚書汴州刺史充宣武軍節度使秋七月戊辰朔御史臺奏秘書省管新舊書五萬六千四百七十六卷長慶二年已前並無文案太和五年已後並不納新書今請創立簿籍據闕添寫卷數逐月申臺從之辛未以左金吾衛將軍傅毅爲鄆坊節度使癸酉宣武軍節度使王智興卒辛卯刑部尚書殷侑檢校右僕射充山南東道節度使壬午以滁州刺史李德裕爲太子賓客甲午以金吾衛大將軍陳君賞爲平盧軍節度使代王彥威以彥威爲戶部侍郎判度支丙申湖南觀察使盧周仁進羨餘錢一十萬貫御史中丞歸融彈其違制進奉詔以周仁所進錢於河陰院收貯八月戊戌朔甲戌詐稱國舅人前鄆坊節度使蕭洪宜長流驪州戊申以皇太后親弟蕭本爲右贊善大夫九月丁卯朔庚辰詔復故左降開州司馬宋申錫正議大夫尚書右丞同平章事仍以其子慎微爲臣固尉以饒州刺史馬植爲安南都護辛巳以壽州刺史高承恭爲邕管經略使辛卯勅秘書省

集賢院應欠書四萬五千二百六十一卷配諸道繕寫冬十月丁酉朔己酉揚州江都七縣水旱損田十一月丙寅朔庚辰浙西觀察使李鄴卒以太子賓客分司東都李德裕檢校戶部尚書充浙西觀察使壬午以兵部尚書皇太子侍讀王起兼判太常卿甲申以左僕射李程兼吏部尚書忠武帥杜棕天平帥王源中奏當道常平義倉斛斗除元額外請別置十萬石十二月丙申朔以京兆尹兼御史大夫薛元賞爲武寧節度徐泗宿濠觀察等使以戶部侍郎兼御史中丞歸融爲京兆尹以給事中狄兼謨爲御史中丞己酉嶺南節度使李從易卒庚戌以華州刺史盧鈞爲廣州刺史充嶺南節度使以中書舍人崔龜從爲華州防禦使辛亥劍南東川節度使馮宿卒壬子太僕卿段伯倫卒癸丑以兵部侍郎楊汝士檢校禮部尚書充劍南東川節度使己未淑王縱薨

二年春正月乙丑朔丙寅宣州觀察使王質卒乙亥以吏部侍郎崔鄂爲宣歙觀察使以右丞鄭瀚爲刑部尚書判左承事庚寅戶部侍

郎判度支王彥威進所撰供軍圖略序曰至德乾元之後迄于貞元  
元和之際天下有觀察者十節度二十有九防禦者四經略者三  
角之師犬牙相制大都通邑無不有兵約計中外兵額至八十餘萬  
長慶戶口凡三百三十五萬而兵額又約九十九萬通計三戶資奉  
一兵今計天下租賦一歲所入總不過三千五百餘萬而上供之數  
三之一焉三分之中二給衣賜自畱州畱使兵士衣食之外其餘四  
十萬衆仰給度支焉二月乙未朔丙申刑部侍郎郭承嘏卒丙午夜  
彗出東方長七尺在危初西指戊申王彥威進所撰唐典七十卷起  
武德終永貞庚戌均王緯薨辛酉夜彗長丈餘直西行稍南指在虛  
九度半壬戌夜彗長二丈餘廣三尺在女九度自是漸長闌三月甲  
子朔內出音聲女妓四十八人令歸家乙丑夜彗星長五丈岐分兩  
尾其一指氐其一掩房丙寅罷曲江宴是夜彗長六丈尾無岐在九  
七度勅尚食使自今每一日御食料分爲十日停內脩造戊辰夜彗  
長八丈有餘西北行東指在張十四度辛未宣徽院法曲樂官放歸



壬申詔曰朕嗣丕構對越上玄虔恭寅畏于今一紀何嘗不宵衣念  
道晷食思愆師周文之小心慕易乾之夕惕懼德不類貽列聖羞將  
欲俗致和平時無殃欲然誠未格物謫見於天仰愧三靈使慙庶彙  
思獲攸濟浩無津涯昔宋景發言星因退舍魯僖納諫飢不害人取  
鑒往賢深惟自勵載軫在予之責宜降恤辜之恩式表殷憂冀答昭  
誠天下死罪降從流流已下並釋放唯故殺人官典犯賊主掌錢穀  
賊盜不在此限諸州遭水旱處並蠲租稅中外脩造並停五坊鷹隼  
悉解放朕今素服避殿徹樂減膳近者內外臣寮繼貢章表欲加徽  
號夫道大爲帝朕膺此稱祗愧已多矧鍾星變之時敢議名揚之美  
非懲旣往且儆將來中外臣寮更不得上表奏請表已在路並宜速  
還在朝群臣方岳長吏宜各上封事極言得失弼違納誨副我虛懷  
甲戌以左僕射李程爲山南東道節度使壬午以楚州刺史嚴譽爲  
桂管觀察使甲申以山南東道節度使殷侑爲太子賓客分司貞興  
門外鵲巢于古冢丁亥邠寧節度使李用卒戊子以河南尹李珣爲

戶部侍郎已丑以金吾大將軍李直臣爲邠寧節度使壬辰挂管觀察使韓欽卒以兵部侍郎裴潏爲河南尹夏四月甲午朔戊戌詔將仕郎守尚書工部侍郎知制誥充翰林學士兼皇太子侍讀上騎都尉賜紫金魚袋陳夷行可本官同中書門下平章事丙子以中書舍人敬昕爲江西觀察使戊申前江西觀察使羅讓卒己酉秘書監張仲方卒丁卯宰相李石奏定長定選格庚申太原節度使李載義辛酉詔置終南山神祠蓬州復置蓬池二縣五月癸亥朔乙丑以東都留守裴度爲太原尹北都留守河東節度使依前守司徒中書令丙寅戶部侍郎李珣判本司事以浙西觀察使李德裕檢校戶部尚書兼揚州大都督府長史充淮南節度使辛未詔以前淮南節度使牛僧孺爲檢校司空東都留守以蘇州刺史盧商爲浙西觀察使壬申上幸十六宅與諸王宴樂決十六宅宮市內官范文喜等三人以供諸王食物不精故也六月癸巳朔丁酉以成德軍節度使王元逵爲駙馬都尉尚壽安公主已亥以鴻臚卿李逵爲天德軍都防禦使庚子吏

部奏長定選格請加置南曹郎中一人別置印一面以新置南曹之印爲文從之丙午河陽軍亂逐節度使李泳戊申以左金吾衛將軍李執方爲河陽三城懷州節度使庚戌以右金吾衛大將軍崔珙爲京兆尹魏博澤潞淄青滄德充海河南府等州並奏蝗害稼鄆州奏蝗得雨自死丁亥以御史中丞狄兼謨爲刑部侍郎以前京兆尹歸融爲秘書監以給事中李翊爲湖南觀察使秋七月壬戌朔乙亥以父旱徙市閉坊門甲申以太府卿張賈爲充海觀察使詔除河北三鎮外諸州府不得以試銜奏官鄆州奏當州先發天平平陰兩縣請復置平陰縣以制盜賊從之乙酉以蝗旱詔諸司疏決繫囚己丑遣使下諸道巡覆蝗蟲是日京畿雨羣臣表賀外州李紳奏蝗蟲入境不食田苗詔書褒美仍刻石于相國寺八月壬辰朔丁酉彗出虛危之間振武奏突厥入寇懿昌庚戌詔昭儀王氏冊爲德妃昭容楊氏冊爲賢妃又詔敬宗皇帝第二子休復第三子執中第四子言揚第六子成美等宜開列土之封用申睦族之典休復可封梁王執中可封

襄王言揚可封汜王成美可封陳王皇第二男宗儉可封蔣王乙丑  
房州刺史盧行簡坐贓杖殺已已以前湖南觀察使盧行術爲陝觀  
察使甲申詔曰慶成節朕之生辰天下錫宴庶同歡泰不欲屠宰用  
表好生非是信尚空門將希無妄之福恐中外臣庶不諭朕懷廣置  
齋筵大集僧衆非獨凋耗物力兼恐致惑生靈自今宴會蔬食任陳  
醢醢永爲常例又勅慶成節宜令京兆尹准上巳重陽例於曲江會  
文武百寮延英奉觴宜權停戊子以尚書戶部侍郎判度支王彥威  
爲衛尉卿分司東都冬十月辛卯朔詔改天后所撰三教珠英爲海  
內珠英戊戌詔嘉王運循王通通王湛並可光祿大夫檢校司空賜  
勳上柱國仍依百官例給料錢安王溶潁王灋並給料錢庚子慶成  
節賜羣臣宴于曲江上幸十六宅與諸王宴樂癸卯宰臣判國子祭  
酒鄭覃進石壁九經一百六十卷時上好文鄭覃以經義啓導稍折  
文章之士遂奏置五經博士依後漢蔡伯喈刊碑列于太學創立石  
壁九經諸儒校正訛謬上又令翰林勒字官唐玄度復校字體又乖

師法故石經立後數十年名儒皆不窺之以爲蕪累甚矣戊申以門下侍郎同平章事李固言爲劍南西川節度使依前同門下侍郎平章事申寅勅鹽鐵戶部度支三使下監院官皆郎官御史爲之使雖更改院官不得移替如顯有曠敗即具事以聞已未以前西川節度使楊嗣復爲戶部尚書充諸道鹽鐵轉運使十一月辛酉朔壬戌以太子賓客分司東都殷侗爲忠武軍節度使癸亥狂病人劉德廣突入含元殿付京兆府杖殺乙丑京師地震丁丑興元節度使令狐楚卒丁亥以刑部尚書鄭澣爲山南西道節度使己丑契丹朝貢十二月庚寅朔丙申閣內對左右史裴素等上自開成初復故事每入閣左右史執筆立於螭頭之下君臣論奏得以備書故開成政事最詳於近代壬寅以前忠武軍節度使杜悰爲工部尚書判度支時悰旣除官久未謝恩戶部侍郎李珣奏杜悰爲岐陽公主服假內珣因言比來駙馬爲公主行服三年所以士族之家不願爲國戚者以此帝大駭其奏即日詔曰制服輕重必資典禮如聞往者駙馬爲公主行服三年緣

情之義殊非故實違經之制今乃聞知宜行葢周永爲定制

三年春正月庚申朔甲子宰臣李石遇盜於親仁里中劒斷其馬尾又中流矢不甚傷是時京城大恐捕盜不獲旣而知仇士良所爲乙丑常恭官入朝者九人而已餘皆潛竄累日方安乙卯詔故齊王湊贈懷懿太子戊申以諸道鹽鐵轉運使正議大夫守戶部尚書上柱國弘農郡開國伯食邑七百戶賜紫金魚袋楊嗣復可本官同中書門下平章事朝議郎戶部侍郎判戶部事上柱國賜紫金魚袋李珣可本官同中書門下平章事依前判戶部事丙子以中書侍郎同中書門下平章事李石爲荆南節度使依前中書侍郎平章事丁丑以前荆南節度使韋長爲河南尹癸未詔去秋蝗蟲害稼處放逋賦仍以本處常平倉賑貸是日大雪二月己丑朔乙未上謂宰臣曰李宗閔在外數年可別與一官鄭覃陳夷行曰宗閔養成鄭注幾覆朝廷其奸邪甚於李林甫楊嗣復李珣奏曰太和末宗閔德裕同時得罪二年之間德裕再量移爲淮南節度使而宗閔尚在貶所凡事貴得

中不可但徇私情上曰與一郡可也丁酉以衡州司馬李宗閔爲杭州刺史庚子吏部奏去年所修長定選格或乖往例頗不便人不可久行請却用舊格從之乙巳詔僕射尚書侍郎左右丞大卿監每遇坐日宜令兩人循次進對丁未以同州刺史孫簡爲陝號觀察使代盧術以術爲福王傳分司東都乙酉禮部尚書許康佐卒辛亥左承盧載爲同州防禦使三月巳未朔庚午封故陳王第十九男儼爲宣城郡王故襄王第三男寀爲樂平郡王夏四月戊子朔巳丑禮部尚書致仕徐晦卒辛卯戶部侍郎崔龜從判本司事詔曰戶部侍郎兩負今後先授上者宜令判本司錢穀加帶平章事判鹽鐵度支兼中丞學士不在此限壬辰以給事中裴衮爲華州防禦使巳酉改法曲爲仙韶曲仍以伶官所處爲仙韶院兵部侍郎裴潏卒癸丑屯田郎中李衢汚王府長史林贊等進所修皇唐玉牒一百五十卷五月丁巳朔勅禮部貢院進士舉人歲限放三十人及第辛酉詔前江西觀察使吳士規坐賊長流端州庚午月犯天心大星癸未以吏部侍郎高

錯為鄂岳觀察使代高重以重為兵部侍郎六月丁未朔辛酉出宮人四百八十送兩街寺觀安置廢晉州平陽院鑾官並歸州縣癸丑上御紫宸對宰臣曰幣輕錢重如何楊嗣復曰此事已久不可遽變其法法變則擾人但禁銅器斯得其要秋七月丙辰朔壬戌陳許節度使殷侑卒甲子以衛尉卿王彥威檢校禮部尚書充忠武軍節度使以右金吾衛大將軍史孝章為邠寧節度使戊辰西川節度使李固言再上表讓門下侍郎及檢校右僕射八月丙戌朔甲午山南東道諸州大水田稼漂盡丁酉詔大河而南幅員千里楚澤之北連亘數州以水潦暴至隄防潰溢旣壞廬舍復損田苗言念黎元懼此災沴或生業蕩盡農功索然困餒彫殘豈能自濟宜令給事中盧弘宣往陳許鄭滑曹濮等道宣慰刑部郎中崔瑋往山南東道鄂岳蘄黃道宣慰己亥嘉王運薨魏博六州蝗食秋苗並盡九月丙辰朔辛酉荆南李石讓中書侍郎乃改授檢校兵部尚書壬戌上以皇太子慢遊敗度欲廢之中丞狄兼謨垂涕切諫是夜移太子於少陽院殺太子宮



人左右數十人戊辰詔梁王等五人先於北內可却歸十六宅辛未  
易定節度使張璠卒壬申以易州刺史李仲遷爲定州刺史充義武  
軍節度使戊寅以東都留守牛僧孺爲左僕射辛巳詔皇太子侍讀  
竇宗直隔日入少陽院冬十月乙酉朔以尚書左丞崔瑄檢校戶部  
尚書充東都留守易定軍亂不納新使李仲遷立張璠子元益爲留  
後己丑以少府監張沼爲黔中觀察使壬辰以右金吾衛將軍高霞  
寓爲夏綬銀宥節度使癸巳以中書舍人李景讓爲華州防禦使甲  
午慶成節命中以酒醑仙韶樂賜群臣宴於曲江亭丁酉夏州節  
度使劉源卒庚子皇太子薨於少陽院謚曰莊恪乙巳以左金吾將  
軍郭昉爲邠寧慶節度使是夜彗起於軫其長三丈東西指巳酉前  
邠寧節度使史孝章卒十一月乙卯朔是夜彗孛東西竟壬戌詔  
曰上天蓋高感應必由乎人事寰宇雖廣理亂盡繫於君心從古已  
來必然之義朕嗣膺寶位十有三年常尅己以恭虔每推誠於衆庶  
將以道迎休應漸致輯熙期克倚於宗祧思保寧於華夏而德有所

未至信有所未孚災氣上騰天文謫見再周朞月重擾星纏當求衣之時覩垂象之變兢懼惕厲若蹈泉谷是用舉成湯之六事念宋景之一言詳求譴告之端採聽銷攘之術必有精理蘊於衆情冀屈法以安人爰恤刑而原下應京城諸道見繫囚自十二月八日已前死罪降流已下遞減一等十惡大逆殺人劫盜官典犯贓不在此限今年遭水蝗蟲處並宜存撫賑給以滄州節度使李彥佐爲鄆曹濮節度使以德州刺史滄景節度副使劉約爲義昌軍節度使癸亥以宋州刺史唐弘實爲邕管經略使乙丑天平軍節度使王源中卒庚午以翰林學士丁居晦爲御史中丞壬申以蔡州刺史韓威爲定州刺史義武軍節度北平軍等使十二月乙酉朔辛丑詔以河東節度使開府儀同三司守司徒兼中書令太原尹北都留守上柱國晉國公食邑三千戶裴度可守司徒中書令以兵部侍郎狄兼謨爲河東節度使丙午守太子太師尚書右僕射門下侍郎國子祭酒同平章事鄭覃罷太子太師仍三五日入中書日本國貢真珠綸

四年春正月甲寅朔丁巳災感太白辰聚於南斗丁卯夜於咸泰殿  
觀燈作樂三宮太后諸公等畢會上性節儉延安公主衣裾寬大即  
時斥歸駙馬竇幹待罪詔曰公主入叅衣服踰制從夫之義過有所  
歸幹宜奪兩月俸錢閏月甲申朔以吏部侍郎鄭肅檢校禮部尚書  
河中晉絳慈隰等州節度使以蘇州刺史李道樞爲浙東觀察使以  
諫議大夫高元裕爲御史中丞丙申以前河中節度使李聽爲太子  
太保己亥裴度自太原至上令中人就第問疾辛丑以司農卿李玘  
爲福建觀察使諫官論其不可乃罷之丙午以大理卿盧貞爲福建  
觀察使丁未興元節度使鄭澣卒戊申閣婆國朝貢二月癸酉朔辛  
酉以吏部侍郎歸融檢校禮部尚書充山南西道節度使丙寅寒食  
節上御通化門以觀遊人戊辰幸勤政樓觀角抵蹴鞠三月癸未朔  
乙酉賜羣臣上巳宴於曲江是夜月掩東井第三星丙申司徒中書  
令裴度卒癸酉浙東觀察使李道樞卒以戶部侍郎崔龜從爲宣歙  
觀察使代崔郾以郾爲太常卿以楚州刺史蕭俶爲浙東觀察使夏

四月壬子朔以右羽林統軍李昌元爲鄜坊節度使壬戌有麋出太廟五月辛丑朔丁亥閣內上謂宰臣曰新修開元政要如何楊嗣復曰臣等未見陛下欲以此書傳示子孫則宣付臣等叅定可否緣開元政事與貞觀不同玄宗或好畋遊或好聲色選賢任能未得盡美撰述示後所貴作程豈容易哉丙申鄭覃陳夷行罷知政事覃守左僕射夷行爲吏部侍郎丙午邠寧節度使郭晁卒天平魏博易定等管內蝗食秋稼六月辛亥朔以長武城使符徹爲邠寧節度使庚申上幸十六宅安王穎王院宴樂賜與頗厚戊辰以久旱分命祠禱每憂動於色宰臣等奏曰水旱時數使然乞不過勞聖慮上改容言曰朕爲人主無德及天下致茲災旱又謫見於天若三日不雨當退歸南內更選賢明以主天下宰臣嗚咽流涕各請策免是夜大雨霑霈丁丑襄陽山竹結實其米可食秋七月庚辰朔西蜀水害稼乙未夜月犯熒惑壬寅以河南尹韋長爲平盧軍節度使以刑部侍郎高錯爲河南尹甲辰以大中大夫守太常卿上柱國賜紫金魚袋崔郾可

本官同中書門下平章事滄景淄青大水八月庚戌朔以給事中姚合爲陝虢觀察使辛亥郟王經薨丙辰邢州廢青山縣磁州移昭義縣於固鎮驛癸亥以左僕射牛僧孺檢校司空同平章事兼襄州刺史充山南東道節度使辛未夜流星出羽林尾長八十餘尺滅後有聲如雷壬申鎮冀四州蝗食稼至於野草樹葉皆盡九月己卯朔辛卯以劔南東川節度楊汝士爲吏部侍郎丁酉夜月掩東井第三星辛丑以吏部侍郎陳夷行爲華州鎮國軍防禦使以蘇州刺史李穎爲江西觀察使以諫議大夫馮定爲桂管觀察使甲辰以京兆尹鄭元復爲劔南東川節度使丙午以前江西觀察使敬昕爲京兆尹冬十月己酉朔戊午慶成節賜群臣宴於曲江亭辛酉夜星入斗魁前桂管觀察使嚴粲卒丙寅制以敬宗第六男陳王成美爲皇太子丁丑太子太保李聽卒十一月己卯朔壬申前福建觀察使唐扶卒己亥曲赦京城繫囚十二月己酉朔癸丑貶光祿卿駙馬都尉韋讓爲澧州長史乙卯乾陵火以杭州刺史李宗閔爲太子賓客分司東都辛

酉上不康百寮赴延英起居乙亥宰臣入謁見上于太和殿是歲戶部計見管戶四百九十九萬六千七百五十二

五年春正月戊寅朔上不康不受朝賀己卯詔立親弟潯王灋為皇太弟權勾當軍國事皇太子成美復為陳王辛巳上崩於大明宮之太和殿壽享三十三羣臣謚曰元聖昭獻皇帝廟號文宗其年八月十七日葬于章陵

史臣曰昭獻皇帝恭儉儒雅出於自然承父兄奢弊之餘當閭寺撓權之際而能以治易亂化危為安太和之初可謂明矣初帝在藩時喜讀貞觀政要每見太宗孜孜政道有意于茲洎即位之後每延英對宰臣率漏下十一刻故事天子隻日視事帝謂宰輔曰朕欲與卿等每日相見其輟朝放朝用雙日可也時憲宗郭后居興慶宮曰太皇太后敬宗母寶曆太后及上母蕭太后時呼三宮太后帝性仁孝三宮問安其情如一嘗內園進櫻桃所司啓曰別賜三宮太后帝曰太后宮送物焉得為賜遽取筆改賜為奉宗正寺以祭器朽敗請易之及

有司呈進命陳於別殿具冠帶而閱之容色悽然尤勤於政理凡選  
內外羣官宰府進名帝必面訊其行能然後補除中書用鴻臚卿張  
賈爲衢州刺史賈好博朝辭曰帝謂之曰聞卿善長行對曰政事之  
餘聊與賓客爲戲非有所妨帝曰豈有好之而無妨也內外聞之悚  
息而帝以累世變起禁闈尤側目於中官欲盡除之然訓注狂狡之  
流制御無術矢謀旣誤幾致顛危所謂有帝王之道而無帝王之才  
雖旰食焦憂不能弭患惜哉

贊曰昭獻統天洪惟令德心憤讐耻志除凶慝未殄孽魑又生鬼蜮  
天未好治亂何由息

唐書本紀卷第十七下

唐書本紀卷第十八上

劉昫

等修

聞人詮校刻沈炯同校

武宗

原

武宗至道昭肅孝皇帝諱炎穆宗第五子母曰宣懿皇后常氏元和中九年六月十二日生於東宮長慶元年三月封穎王本名漚開成中加開府儀同三司檢校吏部尚書依百官例逐月給俸料初文宗追懷莊恪太子殂不由道乃以敬宗子陳王成美爲皇太子開成四年冬十月宣制未遑冊禮五年正月二日文宗暴卒宰相李珣知樞密劉弘逸奉密旨以皇太子監國兩軍中尉仇士良魚弘志矯詔迎穎王於十六宅曰朕自嬰疾疹有加無瘳懼不能躬總萬機日釐庶政稽於謨訓謀及大臣用建親賢以貳神器親弟穎王漚昔在藩邸與朕常同師訓動成儀矩性稟寬仁俾奉昌圖必諧人欲可立爲皇太弟應軍國政事便令權勾當百辟卿士中外庶臣宜竭迺心輔成予志



陳王成美先立為皇太子以其年尚幼未漸師資比日重難不違冊命迴踐朱邸式協至公可復封陳王是夜士良統兵士於十六宅迎太弟赴少陽院百官謁見於東宮思賢殿二日仇士良收捕宣詔院副使尉遲璋殺之屠其家四日文宗崩宣遺詔皇太弟宜於樞前即皇帝位宰相楊嗣復攝冢宰十四日受冊於正殿時年二十七陳王成美安王溶殂於邸第初楊賢妃有寵於文宗而莊恪太子母王妃失寵怨望為楊妃所譖王妃死太子廢及開成末年帝多疾無嗣賢妃請以安王溶嗣帝謀於宰臣李珣珣非之乃立陳王至是仇士良立武宗欲歸功於已乃發安王舊事故二王與賢妃皆死二月制穆宗妃常氏追謚宣懿皇太后帝之母也上御正殿降德音以開府右軍中尉仇士良封楚國公左軍中尉魚弘志為韓國公太常卿崔鄆戶部尚書判度支崔珙並本官同中書門下平章事勅二月十五日玄元皇帝降生日宜為降聖節休假一日三月詔宮人劉氏王氏並為妃勅朔望入閣對刑法官是日非便宜停五月中書奏六月十二日皇

帝載誕之辰請以其日爲慶陽節祔宣懿太后于太廟初武宗欲啓穆宗陵祔葬中書門下奏曰園陵已安神道貴靜光陵二十餘載福陵則近又修崇竊惟孝思足彰嚴奉今若再因合祔須啓二陵或慮聖靈不安未合先旨又以陰陽避忌亦有所疑不移福陵實協典禮乃止就舊墳增築名曰福陵又奏准今年二月八日赦文應京諸司勒留官令本處剋留手力雜給與攝官者臣等檢詳諸道正官料錢絕少雜給手力即多今正官勒留亦管公事料錢少於雜給刻下事未得中臣等商量其正官料錢雜給等錢望每貫割留二百文與攝官餘並如舊從之秋七月制檢校禮部尚書華州刺史陳夷行復爲中書侍郎同平章事八月十七日葬文宗皇帝于章陵知樞密劉弘逸薛季稜率禁軍護靈駕至陵所二人素爲文宗獎遇仇士良惡之心不自安因是掌兵欲倒戈誅士良弘志鹵簿使兵部尚書王起山陵使崔稜覺其謀先諭鹵簿諸軍是日弘逸季鄆伏誅門下侍郎同平章事楊嗣復檢校吏部尚書潭州刺史克湖南都團練觀察使中

書侍郎同平章事李玪檢校兵部尚書桂州刺史充桂管防禦觀察等使御史中丞裴夷直爲杭州刺史皆坐弘逸季稜黨也易定軍亂逐節度使陳君賞君賞鳩合豪傑數百人復入城盡誅謀亂兵士軍城復安九月以淮南節度使檢校尚書左僕射李德裕爲吏部尚書同中書門下平章事尋兼門下侍郎以宣武軍節度使檢校吏部尚書汴州刺史李紳代德裕鎮淮南帝在藩時頗好道術修攝之事是秋召道士趙歸真等八十一人入禁中於三殿修金籙道場帝幸三殿於九天壇親受法籙右拾遺王哲上疏言王業之初不宜崇信過當疏奏不省十一月監鐵轉運使奏江淮已南請復稅茶從之魏博節度使何進滔卒三軍推其子重霸知畱後事會昌元年正月壬寅朔庚戌有事於郊廟禮畢御丹鳳樓大赦改元二月壬寅以淮南節度使檢校吏部尚書李紳爲中書侍郎同平章事中書奏南宮六曹皆有職分各責官業即事不因循近者戶部度支多是諸軍奏請本司郎吏束手閑居今後請祇令本行分判委中書門下簡擇公幹才器相當

者轉授從之車駕幸昆明池賜仇士良紀功碑詔右僕射李程爲其  
文三月貶湖南觀察使楊嗣復湖州司馬桂管觀察使李珣瑞州司  
馬杭州刺史裴夷直驩州司戶宰臣李德裕進位司空三月壬申宰  
相李德裕陳夷行崔珙李紳等奏憲宗皇帝有恢復中興之功請爲  
百代不遷之廟帝曰所論至當續議之事竟不行贈故中書令晉國  
公裴度太師山南東道蝗害稼造靈符應聖院於龍首池四月辛丑  
勅憲宗實錄舊本未備宜令史官重脩進內其舊本不得注破候新  
撰成同進時李德裕先請不遷憲宗廟爲議者沮之復恐或書其不  
善之事故復請改撰實錄朝野非之五月辛未中書門下奏據六典  
隋置諫議大夫七人從四品上大曆二年昇門下侍郎爲正三品兩  
省遂闕四品建官之道有所未周詩云衮職有闕仲山甫補之周漢  
大臣願入禁闥補過拾遺張衡爲侍郎爲居帷幄從容諷諫此皆大  
臣之任故其秩峻其任重則敬其言而行其道况蹇諤之地宜老成  
之人秩未優崇

則難用耆德其諫議大大

望依隋氏舊制昇爲從四品分爲左右以備兩省四品之闕向後與丞郎出入迭用以重其選又御史中丞爲大夫之貳緣大夫秩崇官不常置中丞爲憲臺長令寺監少卿少監司業少尹並爲寺署之貳皆爲四品中丞官名至重見秩未崇望昇爲從四品從之六月有禿鷲鳥集於禁苑庚子夜五更小流星五十餘

旁午流散制以

魏博兵馬畱後何重霸檢校工部尚書魏州大都督府長史充天雄軍節度使仍賜名重順中書奏請依姚璹故事宰相每月脩時政記送史館從之以衡山道士劉玄靖爲銀青光祿大夫充崇玄館學士賜號廣成先生令與道士趙歸真於禁中修法籙左補闕劉彥謨上䟽切諫貶彥謨爲河南府戶曹勅自前中外上封論事有所糾舉則請畱中今後竝云請付御史臺不得云畱中不下如事關軍國理須有密不在此限如臺司勘當後若得事實必獎奉公苟涉加誣必當反問告示中外明知此意七月己巳北方有流星經天娘關東大蝗傷稼襄郢江左大水彗復出室壁之間八月迴鶻烏介可汗遣使告

難言本國爲黠戛斯所攻故可汗死今部人推爲可汗緣本國破散  
今奉太和公主南投大國時烏介至塞上大首領噶沒斯與赤心宰  
相相攻殺赤心率其部下數千帳近西域天德防禦使田牟以聞烏  
介又令其相頡于迦斯上表借天德城以安公主仍乞糧儲牛羊供  
給詔金吾大將軍王會宗正少卿李師偃往其牙宣慰令放公主入  
朝賑粟二萬碩九月幽州軍亂逐其帥史元忠推牙將陳行泰爲留  
後三軍上章請符節朝旨未許十月幽州雄武軍使張絳遣軍吏吳  
仲舒入朝言行泰慘虐不可處將帥之任請以鎮軍加討許之十月  
誅行泰遂以絳知兵馬使車駕校獵咸陽十一月丁酉朔壬寅夜大  
星東北流其光燭地有聲如雷山崩石墮其彗起於室凡五十六日  
而滅太和公主遣使入朝言烏介自稱可汗乞行策命緣初至漢南  
乞降使宣慰從之十二月中書門下奏脩實錄體例舊錄有載禁中  
之言伏以君上與宰臣公卿言事皆須衆所聞見方可書於史冊且  
禁中之語在外何知或得之傳聞多涉於浮妄便形史筆實累鴻猷

唐紀六十一  
四  
今後實錄中如有此色並請刊削又宰臣與公卿論事行與不行須有明據或奏請尤愜必見褒稱或所論乖僻因有懲責在藩鎮上表必有批荅居要官啓事者自有著明並須昭然在人耳目或取捨存於堂案或與奪形於詔勅前代史書所載奏議罔不由此近見實錄多載密疏言不彰於朝聽事不顯於當時得自其家未足爲信今後實錄所載章奏並須朝廷共知者方得紀述密疏並請不載如此則理必可法人皆向公愛憎之志不行褒貶之言必信從之李德裕奏改修憲宗實錄所載吉甫不善之迹鄭亞希旨削之德裕更此條奏以掩其迹搢紳謗議武宗頗知之

二年春正月丙申朔以撫王紘爲開府儀同三司幽州大都督府長史文幽州盧龍節度大使以雄武軍使張絳檢校左散騎常侍兼幽州左司馬知兩使留後仍賜名仲武中書奏百官議九官壇本大祠請降爲中祠宰相崔珙陳夷行奏定左右僕射上事儀注二月丙寅中書奏准元和七年勅河東鳳翔鄜坊邠寧等道州縣官令戶部加

給課料錢歲六萬二千五百貫吏部出得平留官數百員時以爲當  
自後戶部支給零碎不得觀察使乃別將破用徒有加給不及官人  
所以選人憚遠不樂注受伏望令部都與實物及時支還諸道委觀  
察判官知給受專判此案隨月支給年終計帳申戶部又赴選官人  
多京債到任填還致其貪求罔不由此今年三銓於前件州府得官  
者許連狀相保戶部各備兩月加給料錢至支時折下所異初官到  
任不帶息債衣食稍足可責清廉從之太子太師致仕蕭儔卒牒拘  
南詔蠻遣使入朝三月遣使冊迴紇烏介可汗以振武麟勝節度使  
銀青光祿大夫檢校尚書右僕射單于大都護兼御史大夫彭城郡  
開國公食邑二千戶劉沔可檢校右僕射兼太原晉北京留守充河東  
節度管内觀察處置等使代符澈時迴紇在天德命沔以太原之師  
討之四月乙丑朔光祿大夫守司空兼門下侍郎平章事李德裕銀  
青光祿大夫守右僕射門下侍郎平章事崔珙銀青光祿大夫中書  
侍郎同平章事李紳金紫光祿大夫檢校司徒兼太子太保牛僧孺等



上章請加尊號曰仁聖文武至神大孝皇帝戊寅御宣政殿受冊十月九日雨至十四日轉甚乃改用二十三日時有織人告中尉仇士良言宰相作赦書欲減削禁軍衣糧馬草料士良怒曰必若有此軍人須至樓前作鬧宰相李德裕等知之請開延英訴其事帝曰奸人之詞也召兩軍中尉諭之曰赦書出自朕意不由宰相況未施行公等安得此言士良惶恐謝之是日晴霽中書奏元日御含元殿百官就列唯宰相及兩省官皆未開扇前立於欄檻之內及扇開便侍立於御前三朝大慶萬邦稱賀唯宰相侍臣同介冑武夫竟不拜至尊而退酌於禮意事未得中臣等請御殿日昧爽宰相兩省官闕班於香案前俟扇開通事贊兩省官再拜拜訖升殿侍立從之天德奏迴紇族帳侵擾部內勅勸課種桑比有勅命如能增數每歲申聞比知並無遵行恣加剪伐列於鄣市賣作薪蒸自今州縣所由切宜禁斷五月勅慶陽節百官率醖外別賜錢三百貫以備素食合宴仍令京兆府供帳用追集坊市樂人天德軍使田牟奏迴紇大將溫沒斯與

多覽將軍將吏二千六百人請降遣中人齎詔慰勞之宰相李德裕  
兼守司徒太子太師致仕鄭單卒六月甲子朔火星犯木丙寅太白  
犯東井迴紇降將唃沒斯將吏二千六百餘人至京師制以唃沒斯  
檢校工部尚書充歸義軍使封懷化郡王仍賜姓名曰李思忠以迴  
紇宰相受耶勿為歸義軍副使檢校右散騎常侍賜姓名曰李弘順  
七月嵐州人田滿川據郡叛劉沔誅之八月迴紇烏介可汗過天德  
至杞賴烽北俘掠雲朔北川詔劉沔出師守鴈門諸閑迴紇首領屈  
武降幽王授左武衛將軍同正詔以迴紇犯邊漸侵內地或攻或守  
於理何安令少師牛僧孺陳夷行與公卿集議可否以聞僧孺曰今  
百寮議狀以固守閑防伺其可擊則用兵宰相李德裕議以迴紇所  
恃者唃沒赤心耳今已離叛其強弱之勢可見戎人獷悍不顧成敗  
以失二將乘忿入侵出師急擊破之必矣守險示弱虜無由退擊之  
為便天子以為然乃徵發許蔡汴滑等六鎮之師以太原節度使劉  
沔為迴紇南面招討使以張仲武為幽州盧龍節度使檢校工部尚

書

封蘭陵王克

迴紇東面招討使以李思忠為河西党項都將迴紇西南

面招討使皆會軍於太原制以皇子峴為益王岐為交王皇長女為  
昌樂公主第二女為壽春公主第三女永寧公主上御麟德殿見室  
常首領督熱論等十五人太原奏迴紇移帳近南四十里索叛將盟  
沒斯昨至橫水俘虜兼公主上表言食盡乞賜牛羊事賜為詔曰  
朕自臨寰區為人父母唯以好生為德不願黷武為名故自彼國不  
幸為盟沒斯所破來投邊境已歷歲年撫納之間無所不至初則念  
其饑歉給以糧儲旋則知其破傷盡還馬價前後遣使勞問交馳道  
途忸侵擾亦盡不計今可汗尚此近塞未議還蕃朝廷大臣四方節  
鎮皆懷疑忿盡請與師雖朕切務含弘亦所未諭一昨數使迴來皆  
言可汗只待馬價及令付之次又聞所止屢遷或侵掠雲朔等州或  
劫奪羗渾諸部未知此意終欲如何若以未交馬價須近塞垣行止  
之間亦宜先告邊將豈有條來勿往遷徙不常雖云隨逐水草動皆  
逼近城柵遙揣深意但恃姻好之情每覩蹤由實為馳突之計況到

橫水柵下殺戮至多蕃渾牛羊豈陰馳掠黎庶何罪皆被傷夷所以  
中朝大臣皆云迴紇近塞已是違盟更戮邊人實背大義咸願因此  
翦逐以雪殂謝之冤然朕志在懷柔情深屈已寧可汗之負德終未  
悉於幸災石戒直久在京城備知人實憤惋發於誠懇固請自行嘉  
其深見事機不能遠阻可汗審自問遂速擇良圖無至不悅以貽後  
悔詔太原起室帛沙陁三部落吐渾諸部委石雄爲前鋒易定兵千  
人守大同軍契苾通何清朝領沙陁吐渾六千騎趨天德李思忠率  
迴紇党項之師屯保大柵十月吐蕃貢普卒遣使論普熱入朝告哀  
詔將作少監李璟入蕃帛祭帝幸涇陽校獵白鹿原諫議大夫高少  
逸鄭朗等於閣內論陛下校獵太頻出城稍遠萬機廢弛星出夜歸  
方今用兵且宜停止上優勞之諫官出謂宰相曰諫官甚要朕時聞  
其言庶幾減過

三年春正月以宿師于野罷元會勅新授銀州刺史本州押蕃落銀  
川監牧使何清朝可檢校太子賓客左龍武大將軍令分領沙陁吐

渾党項之衆赴振武取劉汚處分二月先詔百官之家不得於京城  
置私廟者其皇城南向六坊不得置其閑僻坊曲即許依舊置太原  
劉汚奏昨率諸道之師至大同軍遣石雄襲迴鶻牙帳雄大敗迴鶻  
於殺胡山烏介可汗被創而走已迎得太和公主至雲州是日御宣  
政殿百寮稱賀制曰夫天之所廢難施繼絕之恩人之所棄當用侮亡  
之道朕每思前訓豈忘格言迴鶻比者自恃兵強久爲桀驁凌虐諸郡  
結怨近鄰黠戛斯潛師彗掃穹居瓦解種族盡膏於原野區落遂至  
於荆榛今可汗逃走失國竊號自立遠踰沙漠寄命邊陲朕念其衰  
殘尋加賑卹每陳章表多詐諛之詞接我使臣如全盛之日無傷禽  
哀鳴之意有困獸猶鬪之心去歲潛入朔川大掠牛馬今春掩襲振  
武逼近城池可汗皆自率兵首爲寇盜不耻破敗莫顧姻親河東節  
度使劉汚料敵伐謀乘機制勝發胡貉之騎以爲前鋒塞詎侯之旗  
伐彼在宥短兵鏖於帳下元惡扶於穀中况乘匪六飛衆纔一旅儲備  
已竭計日可擒太和公主居處不同情義久絕懷士多思亟聞黃鵠

之歌失位自傷寧免綠衣之歎念其羈苦常軫朕心今已脫於豺狼  
再見宮闕上以攄宗廟之宿憤次以慰太皇太后之深慈永言歸寧  
良用欣感其迴紇旣以破滅義在翦除宜令諸道兵馬使同進討河  
東立功將士已下優厚賞給續條疏處分應在京外宅及東都修功  
德迴紇並勒冠帶各配諸道收管其迴紇及摩尼寺莊宅錢物等並  
委功德使以御史臺及京兆府各差官點檢收抽不得容諸色人影  
占如犯者並處極法錢物納官摩尼寺僧委中書門下條疏聞奏以  
麟州刺史天德行營副使石雄爲銀青光祿大夫檢校左散騎常侍  
崖州刺史御史大夫文澧州西城中城都防禦本管押蕃落等使劉  
沔檢校尚書左僕射張仲武檢校尚書右僕射餘並如故黠戛斯使  
注吾合素入朝獻名馬二匹言可汗已破迴鶻迎得太和公主歸國  
差人送公主入朝愁迴鶻殘衆奪之於路帝遂遣中使送注吾合素  
往太原迎公主時烏介可汗中箭走投黑車子詔黠戛斯出兵攻之  
三月太和公主至京師百官班于章敬寺迎謁仍令所司告憲宗穆

宗二室四月昭義節度使劉從諫卒三軍以從諫姪稹爲兵馬留後上表請授節鉞尋遣使齎詔潞府令稹護從諫之喪歸洛陽稹拒朝旨詔中書門下兩省尚書御史臺四品已上武官三品已上會議劉稹可誅可宥之狀以聞五月勅諸道節度使置隨身不得過六十人觀察使不得過四十人經畧都護不得過三十人築望仙觀於禁中宰臣百寮進議狀以昆戎未殄塞上用兵不宜中原生事潞府請以親王遙領令稹權知兵馬事以俟邊上罷兵獨李德裕以爲澤潞內地前時從諫許襲已足失斷自後跋扈難制規脅朝廷以稹豎子不可復踐前車討之必殄武宗性雄俊曰吾與德裕同之保無後悔自是諫官上疏言不可用兵相繼六月西內神龍寺災左軍中尉楚國公仇士良卒秋七月戊子宰相奏秋色已至將議進軍幽州須早平回鶻鎮魏湏速誅劉稹各湏遣使諭旨兼值三鎮軍情今日延英面奏聖旨欲遣張賈克使臣等續更商量張賈幹濟有才甚諳軍中體勢然性剛直氣慮不安和不如且命李回若以臺綱闕人即兵部侍

郎鄭涯久爲征鎮判官情甚精敏雖無詞辯言事分明官重事閑最似相稱上曰不如令李回去即遣回奉使三鎮八月壬戌火星自七月蒼赤色動搖井中至是月十六日犯輿鬼萬年縣東市火黥戛斯使諦德伊斯難珠入朝以右僕射平章事陳夷行檢校司空兼河中尹御史大夫充河中節度晉絳慈隰觀察等使九月制定天下者致風俗於大同安生人者齊法度於畫一雖晉之樂趙家有舊勲漢之韓黥身爲佐命至于干亂紀律罔不梟夷禁暴除殘古今大義故昭義節度劉悟頃居海岱嘗列爪牙屬師道阻兵王師問罪三回開網一境離心乘此危機遂能歸命憲宗嘉其誠款授以南燕穆宗待以腹心委之上黨招致死士固護一方迨于末年已虧臣節劉從諫生稟戾氣幼習亂風因跋扈之資以專封壤恃紀綱之力以襲兵符暫展執珪之儀終無上壽之請隙駒爲喻魏豹姑務於絕河井蛙自居孫述頗聞于恃險誘受亡命妄作妖言中罔朝廷潛圖左道接壤戎帥屢奏陰謀顧髭鬚亂之所矜豈淵魚之是察泊乎沈痼曾靡哀鳴猶



駐將盡之魂恣行邪僻之志罔或奮拔自樹狡童中使授醫莫覩其  
朝服近臣銜命不入於壘門逆節甚明人神共棄其贈官及先所授  
官爵并劉稹在身官爵宜並削奪成德軍節度使王元逵魏博節度  
使何弘敬或姻連王室或任重藩維懇陳一至之誠願揚九伐之戰  
吳漢任職受詔而初無辦嚴卜式朴忠未戰而義形於色況成德軍  
嘗以梟騎橫陣首破朱滔戰氣方酣再迴魯陽之日鼓音不息三騎  
不周之山魏博軍頃以大旆涉河竟殲師道建十二郡之旗鼓以列  
降人削六十年之厲階盡歸皇化士傳餘勇軍有雄名必能稟鄴侯  
之指縱成葛亮之心伐咨爾二師朕所注懷元逵可本官充北面招  
討澤潞使弘敬充東面招討澤潞使 曩者烈祖在藩先天啓聖符  
瑞昭晰彩繪煥於泗亭鑾輅巡遊金石刻於代邸寔謂可封之俗久  
爲仁壽之鄉寇難以來頗著誠節必非同惡感許自新其昭義舊將  
士及百姓等如保初心並赦而不問如能捨逆效順以州郡兵衆歸  
降者必厚加封賞如能擒送劉稹者別授土地以報勲庸頃隨劉悟

鄆州舊將校子孫既有義心宜思改悔如能感喻劉稹束身歸朝必當待之如初特與洗雪爾等舊校亦並酌勞仍委夷行劉沔王茂元各進兵同力攻討其諸道進軍並不得焚燒廬舍發掘墳墓擒執百姓以爲俘囚桑麻田苗各許本戶爲主罪止元惡務拯生靈於戲蕃維大臣抗疏於外髦俊舊老昌言於朝戒朕以祖宗之法不可私一族刑賞之柄所以正萬邦宜用甲兵陳於原野雖朕以恩不聽而群臣以義固爭詢自僉謀諒非獲已布告中外明體朕懷仍以徐泗節度使李彥佐爲澤潞西南面招討使河陽節度使王茂元以本軍屯萬善彥佐制下後踰月未出師朝廷疑其持重乃以天德軍石雄爲彥佐之副劉稹牙將李丕降用爲忻州刺史以陳許節度使王宰充澤潞南面招討使河陽節度使王茂元卒贈司徒王宰代茂元揔萬善之師十月宰相監修國史李紳兵部郎中史館修撰判館事鄭亞進重修憲宗實錄四十卷頒賜有差晉絳行營副招討石雄奏收賊砦五以河東節度使劉沔檢校司空兼滑州刺史御史大夫充義成

唐紀八十一  
軍節度鄭滑濮觀察等使以荆南節度使檢校右僕射同平章事李  
石可檢校司空平章事兼太原尹北都留守充河南節度管内觀察  
等使十一月勅中外官員過爲繁冗量宜減省以便軍民宜令吏部  
條疏合減員數以聞十二月王宰奏收天井關榆杜行營都將王逢  
秦兵少乞濟師詔太原軍二千人赴之初劉沔破迴鶻留三千人戍  
橫水至是李石以太原無兵抽橫水戍卒一千五百人以赴王逢是  
月二十八日橫水軍至太原請出軍優給舊例每一軍絹二疋時劉  
沔交代後軍庫無絹石以已絹益之方可人給一疋便催上路軍  
人以歲將除欲候過歲期既速軍情不悅都頭楊弁乘士卒流怨激  
之爲亂

四年春正月乙酉朔以澤潞用兵罷元會其日楊弁逐太原節度使  
李石勅齋月斷屠出於釋氏國家創業猶近梁隋卿相大臣或公茲  
弊鼓刀者既獲厚利糾察者潛受請求正月以萬物生植之初宜斷  
三日列聖忌斷一日仍准開元二十二年勅三元日各斷三日餘月

不禁壬子河東監軍使呂義忠收復太原生擒楊弁盡斬其亂卒百  
寮稱賀二月甲寅朔丁巳制晉絳河中慈隰等州節度觀察等使中  
散大夫檢校左散騎常侍郎河中尹御史大夫上柱國博陵縣開國  
男食邑三百戶崔元式可檢校禮部尚書兼太原尹北都晉守克河  
東節度觀察等使戊午夜太白犯鎮星辛酉太原送楊弁與其同惡  
五十四人來獻斬於狗脊嶺三月以晉絳副招討石雄爲澤潞西面  
招討以汾州刺史李丕爲副以道士趙歸真爲左右街道門教授先  
生時帝志學神仙師歸真歸真乘寵每對排毀釋氏言非中國之教  
羈耗生靈盡宜除去帝頗信之四月王宰進軍攻澤州五月以司農  
卿薛元賞爲京兆尹六月金紫光祿大夫尚書右僕射中書侍郎同  
平章事判度支崔珙貶澧州刺史癸丑勅諫官論事所見不同連狀  
署名事同糾率此後凡論公事各隨己見不得連署姓名如有大政  
奏論即可連署制追削故左軍中尉仇士良先授官及贈官其家財  
並籍沒士良死後中人於其家得兵杖數千件兼發士良宿罪故也

勅責授官銀青光祿大夫澧州刺史上柱國安平郡開國公食邑二千戶崔珙再貶恩州司馬員外置以珙領鹽鐵時欠宋滑院鹽鐵九十萬貫帝令度支鹽鐵轉運合爲一使七月以淮南節度使檢校司空杜棕守尚書右僕射兼門下侍郎同平章事仍判度支充鹽鐵轉運等使又制銀青光祿大夫守尚書右僕射兼門下侍郎同平章事監修國史上柱國趙郡開國公食邑二千戶李紳可檢校司空平章事楊州大都督府長史淮南節度副大使知節度事吏部條奏中外合減官員一千一百一十四員王元逵奏邢州刺史裴問別將高元武以城降洺州刺史王釗磁州刺史安王以城降何弘敬山東三州平潞州大將郭誼張谷陳楊廷遣人至王宰軍請殺積以自贖王宰以聞乃等詔石雄率軍七千入潞州誼斬劉積首以迎雄澤潞平五州八月戊戌王宰傳積首與大將郭誼等一百五十人露布獻於京師上御安福門受俘百寮樓前稱賀以魏博節度使檢校尚書右僕射同平章事何弘敬進封廬江郡開國公食邑二千戶以成德軍節

度使王元逵檢校司空兼太子太師同平章事進封太原郡開國公  
食邑二千戶宰相李德裕守太尉進封衛國公加食邑一千戶以兵  
部侍郎翰林學士承旨崔鉉爲中書侍郎同平章事河東節度使陳  
夷行卒九月以天德軍使晉絳行營招討使石雄檢校兵部尚書河  
中尹兼御史大夫河中晉絳慈隰等州節度使以前山南東道節度  
使盧鈞檢校尚書左僕射潞州大都督府長史充昭義軍節度使澤  
潞邢洺觀察等使以忠武軍節度陳許蔡等州觀察處置等使河陽  
行營諸軍招討使金紫光祿大夫檢校尚書右僕射兼御史大夫上  
柱國太原郡開國公食邑二千戶王宰檢校司空太原尹北都留守  
充河東節度管内觀察處置等使制曰逆賊郭誼等狐鼠之妖依丘  
穴而作固牛羊之力得水草而逾克久從叛臣皆負逆氣劉從諫背  
德反義掩賊藏姦積其怙亂之謀無非親吏之計劉公直安全慶等  
各憑地險屢抗王師每肆悖言常懷革面况郭誼王協聞邢洺歸款  
懼義旅覆巢賣孽童以圖全據堅城而請命昔伍被詣吏不免就誅

延岑出降終亦夷族致之大辟無所愧懷郭誼劉公直王協安全慶  
李道德李佐堯劉稹稹母阿裴稹弟曹九滿郎君郎妹四娘五娘從  
兄洪卿漢卿周卿魯卿匡堯張谷男涯鮮愁陳楊廷弟宣男醜奴張  
盜男歡郎三寶門客甄戈伎術人郭諗將黨李訓兄仲京王涯姪孫  
羽韓約男茂章茂寶王璠男珪等並處斬于獨柳勅以河陽三城鎮  
遏使爲孟州割澤州隸焉與懷孟澤爲節度號河陽制以皇子愕爲  
開府儀同三司夏州刺史朔方軍節度大使時党項叛命親王以制  
之十月車駕幸鄠縣十一月幸雲陽十二月勅郊禮日近獄囚數多  
案款已成多有翻覆其兩京天下州府見繫囚已結正及兩度番案  
伏款者並令先事結斷訖申時左僕射王起頻年知貢舉每貢院考  
試訖上榜後更呈宰相取可不復人數不多宰相延英論言主司試  
藝不合取宰相與奪比來貢舉艱難放人絕少恐非弘訪之道帝曰  
貢院不會我意不放子弟即大過無論子弟寒門但取實藝耳李德  
裕對曰鄭肅封敎有好子弟不敢應舉帝曰我比聞楊虞卿兄弟朋

比貴勢妨平人道路昨楊知至鄭朴之徒並令落下抑其太甚耳德裕曰臣無名第不合言進士之非然臣祖天寶末以仕進無他伎勉強隨計一舉登第自後不於私家置文選蓋惡其祖尚浮華不根藝實然朝廷顯官湏是公卿子弟何者自小便習舉業自熟朝廷間事臺閣儀範班行准則不教而自成寒士縱有出人之才登第之後始得一班一級固不能熟習也則子弟成名不可輕矣

五年春正月己酉朔勅造望僊臺於南郊壇時道士趙歸真特承恩禮諫官上疏論之延英帝謂宰臣曰諫官論趙歸真此意要卿等知朕宮中無事屏去聲技但要此人道話耳李德裕對曰臣不敢言前代得失只緣歸真於敬宗朝出入宮掖以此人情不願陛下復親近之帝曰我爾時已識此道人不知名歸真只呼趙練師在敬宗時亦無甚過我與之言滌煩爾至於軍國政事唯卿等與次對官論何湏問道士非直一歸真百歸真亦不能相惑歸真自以涉物論遂舉羅浮道士鄧元起有長年之術帝遣中使迎之繇是與衡山道士劉玄



靖及歸真膠固排毀釋氏而拆寺之請行焉宰臣李德裕杜棕李讓  
夷崔鉉太常卿孫簡等率文武百寮上徽號曰仁聖文武章天成功  
神德明道皇帝辛亥有事於郊廟礼畢御承天門大赦天下庚申義  
安太后崩敬宗之母也遺令皇帝三日聽政十三日小祥二十五日  
大祥二十七日釋服兵部尚書歸融奏事貴得中礼從順變配祔之  
礼宜有等差請降服朞以日易月十二日釋服内外臣寮亦請以其  
日釋服陵園制度請無降殺從之以前太原節度使檢校司空李石  
以本官充東都留守二月戊寅朔太白掩昴之北側諫議大夫權知  
禮部貢舉陳商選士三十七人中第物論以為請託令翰林學士白  
敏中覆試落張漬李玕薛忱張覲崔凜王諶劉伯芻等七人三月崔  
鉉罷知政事出為陝號觀察使以御史中丞兼兵部侍郎李回本官  
同平章事夏四月皇第四女封延慶公主第五女封靖樂公主勅祠  
部檢括天下寺及僧尼人數大凡寺四千六百蘭若四萬僧尼二十  
六萬五百宰相杜棕罷知政事以戶部侍郎判戶部崔元式同平章

事六月丙子勅漢魏已來朝廷大政必下公卿詳議博求理道以盡群情所以政必有經人皆向道此後事關礼法群情有疑者令本司申尚書都省下礼官叅議如是刑獄亦先令法官詳議然後申刑部叅覆如郎官御史有能駁難或據經史故事議論精當即擢授遷改以獎之如言涉浮華都無經據不在申聞神策奏修望僊樓及廊舍五百三十九間功畢秋七月庚子勅併省天下佛寺中書門下條疏聞奏據令式諸上州国忌日官吏行香於寺其上州望各留寺一所有一列聖尊容便令移於寺內其下州寺並廢其上都東都兩街請留十寺寺僧十人勅曰上州合留寺工作精妙者留之如破落亦宜廢毀其合行香日官吏宜於道觀其上都下都每街留寺兩所寺留僧三十人上都左街留慈恩薦福右街留西明莊嚴中書又奏天下廢寺銅像鍾磬委塩鐵使鑄錢其鐵像委本州鑄為農器金銀鍮石等像銷付度支衣冠士庶之家所有金銀銅鐵之像勅出後限一月納官如違委塩鐵使依禁銅法處分其土木石等像人留寺內依舊又

奏僧尼不合隸祠部請隸鴻臚寺其大秦穆護等祠釋教旣已釐革  
邪法不可獨存其人並勒還俗迺歸本貫免稅戶如外國人送還本  
處收管八月制朕聞三代已前未嘗言佛漢魏之後像教寔興是由  
季時傳此異俗因緣染習蔓衍滋多以至於蠹耗國風而漸不覺誘  
惑人意而衆益迷洎於九州山原兩京城闕僧徒日廣佛寺日崇勞  
人力於土木之功奪人利於金寶之飾遺君親於師資之際違配偶  
於戒律之間壞法害人無逾此道且一夫不田有受其飢者一婦不  
蠶有受其寒者今天下僧尼不可勝數皆待農而食待蠶而衣寺宇  
招提莫知紀極皆雲構藻飾僭擬宮居晉宋齊梁物力凋瘵風俗澆  
詐莫不由是而致也况我高祖太宗以武定禍亂以文理華夏執此  
二柄足以經邦豈可以區區西方之教與我抗衡哉貞觀開元亦嘗  
釐革剷除不盡流行轉滋朕博覽前言旁求輿議弊之可革斷在不  
疑而中外誠臣協予至意條疏至當宜在必行懲千古之蠹源成百  
王之典法濟人利衆予何讓焉其天下所拆寺四千六百餘所還俗

僧尼二十六萬五百人收充兩稅戶拆招提蘭若四萬余所收膏腴上田數千萬頃收奴婢爲兩稅戶十五萬人隸僧尼屬主客顯明外國之教勒大秦穆護祓二千餘人還俗不雜中華之風於戲前古未行似將有待及今盡去豈謂無時驅游惰不業之徒已踰十萬廢丹雘無用之室何啻億千自此清淨訓人慕無爲之理簡易齊政成一俗之功將使六合黔黎同歸皇化尚以革弊之始日用不知下制朝廷宜體予意制第六女封樂溫公主第七女封長寧公主中書奏伏見公主上表稱妾某者伏以臣妾之義取其賤稱家人之禮即宜區別臣等商量公主上表請如長公主之例並云某邑公主幾女上表郡縣主亦望依此例稱謂從之九月火星犯上將十月乙亥中書奏池水縣武牢關是太宗擒王世充寶建德之地關城東峯有二聖塑容在一堂之內伏以山河如舊城壘猶存威靈皆盛於軒臺風雲疑還於豐沛誠宜百代嚴奉萬邦式瞻西漢故事祖宗嘗行幸處皆令邦國立廟今緣定覺寺例合毀拆望取寺中大殿材木於東峯以造

一殿四面置宮牆伏望名爲昭武廟以昭聖祖武功之盛委懷孟節  
度使差判官一人勾當緣聖像年代以久望令李石於東都揀好畫  
手就增嚴飾初興功日望令東都差分司官一員薦告從之十一月  
甲辰勅悲田養病坊緣僧尼還俗無人主持恐殘疾無以取給兩京  
量給寺田賑濟諸州府七頃至十頃各於本管選耆壽一人勾當以  
充粥料十二月車駕幸咸陽給事中常弘質上疏論中書權重三司  
錢穀不合相府兼領宰相奏論之曰臣等昨於延英對恭聞聖上常  
欲朝廷尊臣下肅此是陛下深究理本也臣按管子云凡國之重器  
莫重於令令重則君尊君尊則國安故國安在於尊君尊君在于行  
令君人之理本莫要于出令故曰虧令者死益令者死不行令者死  
不從令者死又曰令行于上而下論可不可是上失其威下繫於人  
也自太和已來其風大弊令出于上非之於下此弊不除無以理國  
也昨常弘質所論宰相不合兼領錢穀臣等輒以事體陳聞昔匡衡  
所以云大臣者國家之股肱萬姓所瞻仰明王所慎擇傳曰下輕

其上賤人圖柄則國家搖動而人不靜弘質受人教導輒獻封章是則賤人圖柄矣蕭望之漢朝名儒重德爲御史大夫奏云今首歲日月少光罪在臣等上以望之意輕丞相乃下侍中御史詰問貞觀中監察御史陳師合上書云人之思慮有限一人不可兼總數職太宗曰此人妄有毀謗欲離間我君臣流師合於嶺外賈誼云人主如堂群臣如陛陛高則堂高亦由將相重君臣尊其勢然也如宰相姦謀隱匿則人人皆得上論至於制置職業固是人主之柄非小人所得干議古者朝廷之士各守其官思不出位弘質賤人豈得以非所宜言上瀆明主此是輕宰相撓時政也昔東漢處士橫議遂有黨錮事起此事深要懲絕伏望陛下詳其姦詐去其朋徒則朝廷安靜制令肅然臣等不勝感憤之至弘質坐貶官又奏曰天寶已前中書除機密遷授之外其他政事皆與中書舍人同商量自艱難已來務從權便政頗去於臺閣事多繫於軍期決遣萬機不暇博議臣等商量今後除機密公事外諸侯表疏百寮奏事錢穀刑獄等事望令中書舍人

六人依故事先參詳可否臣等議而奏聞從之李德裕在相位日久朝臣爲其所抑者皆怨之自崔鉉杜悰罷相後中貴人上前言德裕太專上意不悅而白敏中之徒教弘質論之故有此奏而德裕結怨之深由此言也

六年春正月癸卯朔丁巳左散騎常侍致仕馮定卒贈工部尚書已未南詔契丹室韋渤海特柯昆明等國遣使入朝對于麟德殿兵部侍郎判度支盧商奏諸道兵討伐党項今差度支郎官一人往所在有糧料州郡先計度支給從之己丑渤海王子大之萼入朝東都太微宮修成玄元皇帝玄宗肅宗三聖容遣右散騎常侍裴章往東都薦獻監察元壽奏前彭州刺史李紱買本州龍興寺婢爲乳母違法貶隨州長史二月壬申朔癸酉以時雨愆候詔京城天下繫囚除官典犯贓持仗劫殺忤逆十惡外罪遞減一等並釋放征党項行營兵士不得濫有殺傷丁丑左拾遺王龜以父興元節度使起年高乞休官侍養從之是夜月犯畢大星相去三寸庚辰以夏州節度使米暨

充東北道招討党項使壬午右庶子呂讓進狀亡兄溫女太和七年嫁左衛兵曹蕭敏生二男開成三年敏心疾乖忤因而離婚今敏日愈却乞與臣姪女配合從之乙酉前太子少保劉沔可太子太保致仕前壽州刺史王鎮賤潞州長史丁亥夜月色少光至一更一點犯熒惑相去四寸後良久其光燭地在軫七度壬辰以翰林學士起居郎孫穀為兵部員外郎充職以旱停上巳曲江賜宴勅比緣錢重幣輕生人轉困今新加鼓鑄必在流行通變救時莫切於此宜申先甲之令以儆居貨之徒京城諸道宜起來年正月已後公私行用並取新錢其舊錢權停三數年如有違犯同用鉛錫錢例科斷其舊錢並沒納又勅諸道鑄錢已有次第須令舊錢流例有布絹價值稍增丈武百寮俸料起三月一日並給見錢一半先給疋段對估時價皆給見錢貶舒州刺史蘇滌為連州刺史滌李宗閔黨前自給事中為德裕所斥累年郡守至是李紳言其無政故也以邠寧節度使高承恭充西南面招討党項使丙申夜月掩牛南星又犯歲星丁酉新羅使



金國連入朝辛丑夜東北流星如桃色赤其光燭地尾迹入大角西  
流穿紫微垣三月壬寅上不豫制改御名炎帝重方士頗服食修攝  
親受法籙至是藥躁喜怒失常疾既篤旬日不能言宰相李德裕等  
請見不許中外莫知安否人情危懼是月二十三日宣遺詔以皇太  
叔光王柩前即位是日崩時年三十三謚曰至道昭肅孝皇帝廟號  
武宗其年八月葬於端陵德妃王氏祔焉

史臣曰開成中王室寢卑政由閹寺及綴衣將變諸位遽移昭肅以  
孤立維城副茲當璧而能雄謀勇斷振已去之威權運策勵精拔非  
常之俊傑屬天驕失國豁孽阻兵不惑盈庭之言獨納大臣之計戎  
車旣駕亂畧底寧紀律再張聲名復振足以蹈彰武出師之迹繼元  
和戡亂之功然後迂訪道之車築礼神之館棲心玄牝物色幽人將  
致俗於大庭欲希蹤於姑射於是削浮圖之法懲游惰之民志欲矯  
步丹梯求珠赤水徒見蕭衍姚興之謬李不悟秦王漢武之非求蓋  
惑於左道之言偏斥異方之說况身毒西來之教向欲干禩蚩蚩之

民習以成俗畏其教甚於國法樂其徒不異登僊如文身祝髮之鄉  
久習而莫知其醜以吐火吞刀之戲乍觀而便以爲神安可正之以  
咸韶律之以童甫加以竿融何克之倭代不乏人非荀卿孟子之賢  
誰興正論一朝隳殘金狄燼棄胡書結怨於膜拜之流犯怒於鄙夫  
之口哲王之舉不駭物情前代存而勿論實爲中道欲革斯弊以俟  
河清昭庸明照聽斯弊矣

唐書本紀卷第十八上



唐書本紀卷第十八下

劉昫等修

聞人詮校刻沈桐同校

宣宗

宣宗聖武獻文孝皇帝諱忱憲宗第十三子母曰孝明皇后鄭氏在  
和五年六月二十二日生於大明宮長慶元年三月封光王名怡會  
昌六年三月一日武宗疾篤遺詔立爲皇太叔權勾當軍國政事翌  
日柩前即帝位改今名時年二十七帝外晦而內明嚴重寡言視瞻  
特異幼時宮中以爲不慧十餘歲時遇重疾沈綴忽有光輝燭身厥  
然而興正身拱揖如對臣寮乳媪以爲心疾穆宗視之撫其背曰此  
吾家英物非心慙也賜以王如意御馬金帶常夢乘龍昇天言之於  
鄭后乃曰此不宜人知者幸勿復言歷太和會昌朝僉事韜晦群居  
游處未嘗有言文宗武宗幸十六宅宴集強誘其言以爲戲劇謂之  
光叔武宗氣豪尤不爲禮及監國之日哀毀滿容接待群寮決斷庶

務人方見其隱德焉四月辛未釋服尊母鄭氏曰皇太后以兵部侍郎翰林學士承旨白敏中守本官同中書門下平章事以特進守太尉門下侍郎同平章事上柱國衛國公食邑二千人李德裕檢校太尉同平章事江陵尹荆南節度使以中散大夫大理卿馬植爲金紫光祿大夫刑部侍郎充諸道鹽鐵等使以成德軍節度使王元逵檢校太保山南西道節度使王起檢校司空魏博節度使何弘敬淮南節度使李昇並檢校司空劍南西川節度使崔郾檢校尚書右僕射同中書門下平章事並如故東都留守李石奏修奉太廟畢所迎奉太微宮神主祔廟訖東都太廟者本武后家廟神龍中宗反正廢武氏廟主立太祖已下神主祔之安祿山陷洛陽以廟爲馬廐棄其神主而協律郎嚴郢收而藏之史思明再陷洛陽尋又散失賊平東京留守盧正已又募得之廟已焚毀乃寄主於太微宮大曆十四年留守路嗣恭奏重修太廟以迎神主詔百官參議紛然不定禮儀使顏真卿堅請歸祔不從會昌五年留守李石因太微宮正殿圯侈以

廢弘敬寺爲太廟迎神主祔之又下百寮議皆言准故事無兩都俱置之禮唯禮部侍郎陳商議云周之文武有鎬洛二廟今兩都異廟可也然不宜置主於廟主宜依禮瘞於廟之北墉下事未行而武宗崩宣宗即位因詔有司迎太微宮寓主祔廢寺之新廟而知禮者非之制皇長男溫可封鄆王二男涇可封雅王第三男滋可封蘄王第四男沂可封慶王五月初五左右街功德使奏准今月五日赦書節文上都兩街舊留四寺外更添置八所兩所依舊名興唐寺保壽寺六所請改舊名寶應寺改爲資聖寺青龍寺改爲護國寺菩提寺改爲保唐寺清禪寺改爲安國寺法雲尼寺改爲唐安寺崇敬尼寺改爲唐昌寺右街添置八所西明寺改爲福壽寺莊嚴寺改爲聖壽寺舊留寺二所舊名千福寺改爲興元寺化度寺改爲崇福寺永泰寺改爲萬壽寺溫國寺改爲崇聖寺經行寺改爲龍興寺奉恩寺改爲興福寺勅旨依奏誅道士劉玄靖等十二人以其說惑武宗排毀釋氏故也今月五日赦書節文吏部三銓選士祇憑資考多匪實才許觀察

使刺史有奇才異政之士聞薦試用又觀察使刺史交代之時冊書所交戶口如能增添至千戶即與超遷如逃亡至七百戶罷後三年內不得任使又徙流人在天德振武者管中量借糧種俾令耕田以爲業以劍南東川節度使檢校禮部尚書盧商爲兵部侍郎同平章事六月以戶部侍郎充諸道塩鐵轉運使馬植本官同平章事七月以兵部尚書李讓夷爲劍南東川節度使十月勅太廟祫享合以功臣配其憲宗廟以裴度杜黃裳李愬高崇文等配享以荆南節度使李德裕爲東都留守十一月有司享太廟其穆宗室文曰皇兄太常博士閔慶之奏夫禮有尊尊而不叙親親祝文稱弟未當請改爲嗣皇帝從之京兆府奏京師百司職田斛斛請准會昌三年例許人戶自送納京師所異州縣無得欺隱從之以江西觀察使周墀爲義成軍節度使鄭滑觀察等使十二月刑部尚書判度支崔元式奏准七月二日勅綾紗絹等次弱疋段並同禁斷不得織造臣欲與塩鐵戶部三司同條疏先勘左藏庫令分析出次弱疋段州府即牒本道官搜

索狹小機杼令焚毀其已納到次弱疋段具數以聞上從之大中元  
年春正月戊戌朔宮苑使奏皇帝致齋行事內諸宮苑門共九十四  
所並令鎖閉鑰匙進內候車駕還宮則請領從之戊申皇帝有事於  
郊廟禮畢御丹鳳門大赦改元制條曰古者郎官出卿相治郡所以  
重親人之官急爲政之本自澆風久扇此道稍消頽頽清途便臻顯  
貴治人之術未嘗經心欲使究百姓艱危通天下利病不可得也爲  
政之始思厚儒風軒墀近臣蓋備顧問如其不知人疾苦何以膺朕  
眷求今後諫議大夫給事中中書舍人未曾任刺史縣令或在任有  
賦累者宰臣不得擬議守宰親人職當撫字三載考績著在格言貞元  
年中屢下明詔縣令五考方得改移近者因循都不遵守諸州或得  
五考畿府罕及二年以此字人若爲成政道途郡吏有迎送之勞鄉  
里庶民無蘇息之望自今酒滿三十六箇月永爲常式二月丁卯制憲  
宗第十七子惕封彭王第十八子惲爲棣王第五子澤爲濮王第六  
子潤爲鄂王勅修百福殿以檢校太尉東都留守李德裕爲太子少



保分司東都以給事中鄭亞爲桂州刺史御史中丞桂管防禦觀察等使二月丁酉禮部侍郎魏扶奏臣今年所放進士三十三人其封彥卿崔琢鄭延休等三人實有詞藝爲時所稱皆以父兄見居重位不得令中選詔令翰林學士承旨戶部侍郎韋琮重考覆勅曰彥卿等所試文字並合度程可放及第有司考試祇在至公如涉請託自有朝典今後但依常例放榜不得別有奏聞帝雅好儒士留心貢舉有時微行人間採聽輿論以觀選士之得失每山池曲宴學士詩什屬和公卿出鎮亦賦詩餞行凡對臣寮肅然拱揖鮮有輕易之言大臣或獻章䟽即燒香盥手而覽之當時以大中之政有貞觀之風焉又勅自今進士放榜後杏園任依舊宴集有司不得禁制武宗好巡遊故曲江亭禁人宴聚故也閏三月勅會昌季年併省寺宇雖云異方之教無損致理之源中國之人久行其道輦輦過當事體未弘其靈山勝境天下州府應會昌五年四月所廢寺宇有宿舊名僧復能修創一任住持所司不得禁止四月積慶太后蕭氏崩謚曰貞獻文宗

母也六月以義成軍節度使周墀爲兵部侍郎判度支冊黜憂斯王  
子爲英武誠明可汗命鴻臚卿李業入蕃冊拜以金紫光祿大夫守  
太子少保分司東都上柱國奇章郡開國公食邑二千戶牛僧孺守  
太子太師銀青光祿大夫行太子賓客上柱國隴西郡開國公食邑  
二千戶李彥佐爲太子太保並依前分司以左諫議大夫庾簡休爲  
號州刺史以正議大夫行尚書考功郎中知制誥上柱國崔瑋爲中  
書舍人以中散大夫前朔州刺史彭陽縣開國男食邑三百戶令狐  
絢行尚書考功郎中知制誥秋七月制以正議大夫尚書戶部侍郎知  
制誥翰林學士承旨柱國賜紫金魚袋韋琮以本官同中書門下平  
章事以太子少保分司東都衛國公李德裕爲人所訟貶潮州司馬  
員外置同正員八月工部尚書中書侍郎平章事盧商出爲鄂岳觀  
察使神策軍奏修百福殿成名其殿曰雍和殿樓曰親親樓凡廊舍  
屋宇七百間以會諸王子孫九月前永寧縣尉吳汝納詣闕稱寃言  
弟湘會昌四年任楊州江都縣尉被節度使李紳誣奏湘賊罪宰相李

德裕曲情附紳斷臣第湘致死詔下御史臺鞠按

三年春正月壬戌宰臣率文武百寮上徽號曰聖敬文思和武光孝  
皇帝御宣政殿受冊訖宣德音神策軍修左銀臺門樓屋宇及南面  
城牆至睿武樓二月制劔南西川節度光祿大夫檢校吏部尚書同  
平章事成都尹上柱國隴西郡開國公食邑二千戶李回責授湖南  
觀察使桂州刺史御史中丞鄭亞責授管防禦觀察使循州刺史前  
淮南觀察判官魏鉶貶吉州司戶陸渾縣令元壽貶韶州司戶殿中  
侍御史蔡京貶澧州司馬御史臺奏據三司推勘吳湘獄謹具逐人  
罪狀如後揚州都虞候盧行立劉群於會昌二年五月十四日於阿  
顏家喫酒與阿顏母阿焦同坐群自擬收阿顏為妻妾稱監軍使處  
分要阿顏進奉不得嫁人兼擅令人監守其阿焦遂與江都縣尉吳  
相密約嫁阿顏與湘劉群與押軍牙官李克勲即時遮欄不得乃令  
江都百姓論湘取受節度使李紳追湘下獄計賊處死具獄奏聞朝  
廷疑其冤差御史崔元藻往揚州按問據湘雖有取受罪不至死李

德裕黨附李紳乃貶元藻嶺南取淮南元申文案斷湘處死今據三  
司使追崔元藻及淮南元推判官魏鉶并關連人款狀淮南都虞候  
劉群元推判官魏鉶典孫貞高利錢倚黃嵩江都縣典沈頴臣宰節  
度押牙白涉鎮遏使傳義左都虞候盧行立天長縣令張弘思典張  
洙清陳廻右廂子巡李行璠典臣金弘舉送吳湘妻女至澧州取受  
錢物人潘宰前揚府錄事叅軍李公佐元推官元壽吳珙翁恭太子  
少保分司李德裕西川節度使李回桂管觀察使鄭亞等伏候勅旨  
其月勅李回鄭亞元壽魏鉶已從別勅處分李紳起此冤訴本由不  
真今既身歿無以加刑粗塞衆情量行削奪宜追奪三任官告送刑  
部注毀其子孫稽於經義罰不及嗣並釋放李德裕先朝委以重權  
不務絕其黨庇致使冤苦直到于今職爾之由能無恨歎昨以李威  
所訴已經遠貶俯全事體特爲從寬宜准去年勅令處分張弘思李  
公佐卑吏守官制不由已不能守正曲附權臣各削兩任官崔元藻  
曾受無辜之貶合從洗雪之條委中書門下商量處分李恪詳驗款

狀蠹害最深以其多時湏議減等委京兆府決脊杖十五配流天德  
李克勳欲收阿顏決脊杖二十配流磧州劉群據其款狀合議痛刑  
曾効職官不欲決脊決臀杖五十配流岳州其盧行立及諸典吏委  
三司使量罪科放訖聞奏三月己酉兵部侍郎判度支周墀本官平  
章事以禮部尚書呂岳鐵轉運使馬植本官同平章事日本國王子  
入朝貢方物王子善基帝令待詔顧師言與之對手五月己未日有  
蝕之六月己丑太皇太后郭氏崩謚曰懿安憲宗妃穆宗之母也戶  
部侍郎兼御史大夫判度支崔龜從奏應諸司場院官請却官本錢  
後或有欺隱欠負徵理湏足不得苟從恩蕩以求放免今後凡隱盜  
欠負請如官典犯贓例處分縱逢恩赦不在免限從之七月戊午以  
前山南西道節度使高元裕爲吏部尚書八月戊子朝散大夫中書  
舍人充翰林學士上柱國平陰縣開國男食實封三百戶賜紫金魚  
袋畢誠爲刑部侍郎九月勅比有無良之人於街市投匿名文書及  
於箭上或旗幡上縱爲奸言以亂國法此後所由切如捉搦如獲此

色便仰焚瘞不得上聞十一月兵部侍郎判戶部事魏扶奏天下州府錢物斛斗文簿並委錄事參軍專判仍與長史通判至交代時具數申奏如無懸欠量與減選注擬勅路隨等所修憲宗實錄舊本却仰施行其會昌新修者仰並進納如有抄錄得勅到並納史館不得輒留委州府嚴加搜捕以戶部侍郎判度支崔龜從本官同平章事銀青光祿大夫門下侍郎兼禮部尚書同平章事韋琮爲太子詹事分司東都三年春正月丙寅涇原節度使康季榮奏吐蕃宰相論恐熱以秦原安樂三州及石門等七關之兵民歸國詔太僕卿陸贄往喻旨仍令靈武節度使朱叔明邠寧節度使張景緒各出本道兵馬應接其來以太常卿封敖檢校兵部尚書爲興元尹山南西道節度使三月乙卯勅待詔官宜令與刑法官諫官次對銀青光祿大夫中書侍郎同平章事監修國史上柱國汝南縣開國子食邑五百戶周墀檢校刑部尚書梓州刺史文劍南東川節度使四月以正議大夫守中書侍郎同平章事集賢殿大學士賜紫金魚袋馬植爲太子賓

客分司東都以正議大夫守御史大夫上柱國博陵縣開國子食邑  
五百戶賜紫金魚袋崔鉉可中書侍郎平章事正議大夫行兵部侍  
郎判戶部事上柱國鉅鹿縣開國男食邑五百戶賜紫金魚袋魏扶可  
本官平章事五月幽州節度使檢校司徒平章事張仲武卒三軍以  
其子直方知留後事六月癸未五色雲見于京師勅先經流貶罪人  
不幸歿於貶所有情非惡逆任經刑部陳牒許令歸葬絕遠之處仍  
量事官給棺槨康季榮奏收復原州石門驛葭木峽制勝六盤石峽  
等六關訖邠寧張君緒奏今月十三日收復蕭關御史臺奏義成軍  
節度使韋讓於懷真坊侵街造屋九間已令毀拆訖勅於蕭關置武  
州改長樂爲威州七月三州七關軍人百姓皆河隴遺黎數千人見於  
闕下上御延喜門撫慰令其解辦賜之冠帶共賜絹十五萬疋八月  
鳳翔節度使李玘奏收復秦州制曰自昔皇王之有國也曷嘗不文  
以守成武以集事叅諸二柄歸乎大寧朕猥荷丕圖思弘景運憂勤  
庶政四載于茲每念河湟土疆縣亘遐闊自天寶末犬戎乘我多難

無力禦姦遂縱腥羶不遠京邑事更十葉時近百年進士試能靡不竭其長策朝廷下議皆亦聽其直詞盡以不生邊事爲永圖且守舊地爲明理荏苒於是收復無由今者天地儲祥祖宗垂佑左任輸欵邊壘連降刷耻建功所謀必剋實樞衡妙算將帥雄稜副玄元不爭之文絕漢武遠征之悔旣脫頓空於內地斥堠全據於新封莫大之休指期而就況將士等櫛沐風雨暴露郊原披荊棘而刁斗夜嚴逐豺狼而穹廬曉破動皆如意古無與京念此誠勤宜加寵賞涇原宜賜絹六萬疋靈武五萬疋鳳翔邠寧各四萬疋並以戶部產業物色充仍待季榮叔明李玘君緒各迴戈到鎮度支差腳支送四道立功將士各具名銜聞奏當議甄酬其秦威原三州及七關側近訪聞田土肥沃水草豐美如百姓能耕墾種蒔五年內不加稅賦五年已後重定戶籍便任爲永業溫池塩利可贍邊陲委度支制置聞奏鳳翔邠寧靈武涇原守鎮將士如能於本戍處耕墾營田即度支給賜牛糧子種每年量得斛斛便充軍糧亦不限約定數三州七關鎮守官健



每人給衣糧兩分一分依常年例支給一分度支加給仍二年一替換其家口委長吏切加安存官健有莊田戶籍者仰州縣放免差役秦州至隴州已來道路要置堡柵與秦州應接委李玘與劉臯即便計度聞奏如商旅往來官健父兄子弟通傳家信關司並不得邀詰阻滯三州七關刺史關使將來訓練捍防有效能者並與超序官爵劔南西川沿邊沒蕃州郡如力能收復本道亦宜接借三州七關創置戍卒且要務靜如蕃人求市切不得通有來投降者申取長吏處分嗚呼七關要害三郡膏腴候館之殘趾可尋唐人之遺風尚在追懷往事良用興嗟夫取不在廣貴保其金湯得必有時詎計於遲速今則便務修築不進干戈必使足食足兵有備無患載洽亭育之道永致生靈之安中外臣寮宜體朕意九月辛亥西川節度使杜棕奏收復維州制曰朕祇荷丕業思平泰階將分邪正之源冀使華夷胥悅其有常登元輔久奉武宗深苞禍心盜弄國柄雖已行譴斥之典而未塞億兆之言是議再舉朝章式遵彝憲守潮州司馬員外置同正

員李德裕早藉門地叨踐清華累居將相之榮唯以姦傾爲業當會  
昌之際極公台之榮騁諛佞而得君遂恣橫而持政專權生事妬賢  
害忠動多詭異之謀潛懷僭越之志秉直者必棄向善者盡排誣貞  
良造朋黨之名肆讒構生加諸之豐計有踰於指鹿罪實見其欺天  
屬者方處鈞衡曾無嫌避委國史於愛憎之手寵祕文於弱子之身  
洎叅信書亦引親昵恭惟元和寶錄乃不刊之書擅敢改張罔有畏  
忌奪他人之懿績爲私門之令猷又附李紳之曲情斷成吳湘之冤  
獄凡彼簪纓之士過其取捨之途驕居自夸狡蠹無對擢爾之髮數  
罪未窮載闕罔上之由益驗無君之意使天下之人重足而迹皆讐  
懼奉面而慢易在心爲臣若斯於法何遁於戲朕務全大體久爲含  
容雖黜降其官榮尚蓋截其醜狀而睥睨未已兢惕無聞積惡旣彰公  
議難抑是宜移投荒服以謝萬邦中外臣寮當知予意可崖州司戶  
叅軍所在馳驛發遣縱逢恩赦不在量移之限以起居郎庾道蔚禮  
部員外郎李文儒並充翰林學士十月辛巳京師地震河西天德靈

夏尤甚戍卒壓死者數千人十一月東川節度使鄭涯鳳翔節度使李玼奏修文川谷路自靈泉至白雲置十一驛下詔褒美經年爲雨所壞又令封敖修斜谷舊路以刑部侍郎韋有翼爲御史中丞以職方員外郎鄭處誨兼御史知雜幽州軍亂逐其留後張直方軍人推其衙將周綝爲留後十二月追謚順宗曰至德大聖大安孝皇帝憲宗曰昭文彰武大聖孝皇帝初以河湟收復百寮請加徽號帝曰河湟收復繼成先志朕欲追尊祖宗以昭功烈白敏中等對曰非臣愚昧所能及至是上御宣政殿行事及冊出俯僂目送流涕嗚咽崖州司戶叅軍李德裕卒於貶所四年春正月以追尊二聖御正殿大赦天下徙流比在天德者以十年爲限旣遇鴻恩例減三載但使循環添換邊不闕人次第放歸人無怨苦其奉原威武諸州諸關先准格徒流人亦量與立限止於七年如要住者亦聽諸州府縣官如請工假一月已下權差諸廳判官一月已上即准勾當例其課料等據數每貫刻二百文與見判案官添給有故意殺人者雖已傷未死已死更

生意欲殺傷偶然得免並同已殺人條處分二月皇女萬壽公主出降右拾遺鄭顥以顥為銀青光祿大夫行起居郎駙馬都尉三月己卯刑部奏監臨主守應將官物私自貸使并貸借人及以已物中納官司者并專知別當王掌所由有犯賊並同犯入已賊不在原赦之限從之以幽州節度副大使檢校工部尚書張直方為左金吾衛將軍四月勅法司用刑或持巧詐分律兩端遂成其罪既奸吏得計則黎庶何安自今後應書罪定刑宜直指其事不得舞文妄有援引又刑部奏准今年正月一日勅節文據會昌元年三月二十六日勅竊盜賊至一貫文處死宜委所司重詳定條目奏聞臣等檢校並請准建中三年三月二十四日勅竊盜賊滿三疋已上決殺如賊數不充量請科放從之七月丙子大理卿劉濛奏古者懸法示人欲使人從善遠罪至於不犯以致刑措准太和二年十月二十六日刑部侍郎高鉞條疏准勘節目一十一件下諸州府粉壁書於錄事參軍食堂每申奏罪人須依前件節目歲月滋久文字湮淪州縣推案多違漏節目今後

請下諸道令刻石置於會食之所使官吏起坐觀省記憶條目庶令  
案牘周詳從之八月刑部侍郎御史中丞魏謩奏諸道州府百姓詣  
臺訴事多差御史推劾臣恐煩勞州縣先請差度支戶部鹽鐵院官  
帶憲銜者推劾又各得三司使申稱院官人數不多例專掌院務課  
績不辦今諸道觀察使幕中判官少不下五六人請於其中帶憲銜  
者委令推劾如累推有勞能雪冤滯御史臺闕官便令奏用從之九  
月以朝請大夫檢校禮部尚書孟州刺史河陽三城節度使李拭為  
太原尹北都留守河東節度等使幽州節度使周緄卒軍人立其牙  
將張允伸為留後十月中書侍郎平章事魏扶罷知政事十一月已  
亥勅收復成維扶等三州建立已定條令制置一切合同其已配到  
流人宜准秦原威武等州流例七年放還以戶部侍郎判本司事令  
狐綯為兵部侍郎同平章事十二月以華州刺史周敬復為光祿大  
夫檢校左散騎常侍兼洪州刺史江南西道團練觀察使賜金紫  
五年春正月甲戌制皇第七子洽封懷王第八子訥為昭王第九子

汝爲康王勅兩京天下州府起 大中五年正月一日已後三年內不得殺牛如郊廟享祀合用者即與諸畜代二月戶部侍郎裴休充諸道塩鐵轉運等使四月癸卯刑部侍郎劉瑑奏據今年四月十三日已前凡三百四十四年雜制勅計六百四十六門二千一百六十五條議輕重名曰大中刑法統類欲行用之五月以太原尹河東節度使李拭爲鳳翔節度使李業檢校戶部尚書太原尹北都留守充河東節度使守司空門下侍郎太原郡開國伯食邑一千戶白敏中檢校司徒同平章事邠州刺史充邠寧節度觀察東面招討党項等使以戶部侍郎判戶部事魏謩本司同平章事七月宰相監修國史崔龜從續柳芳唐曆二十二卷上之八月勅公主邑司擅行文牒恐多影庇有紊條章今後公主除錄徵封外不得令邑司行文書牒府縣如緣公事令邑司申宗正寺與酌事體施行汝州刺史張義潮遣兄義潭以瓜沙伊蕭等十一州戶口來獻自河隴陷蕃百餘年至是悉復隴右故地以義潮爲瓜沙伊等州節度使九月勅條疏刺史交代湏二交割

公事與知州官方得離任准會昌元年勅刺史只禁科率由抑配人戶至於使州公廨及雜利潤天下州府皆有規制不敢違越緣未申明勅處分多被無良人吏致使恐嚇或致言訟起今後應刺史下擔什物及除替後資送錢物但不率歛官吏不科配百姓一任各守州縣舊例色目支給如無公廨不在資送之限若輒有率配以入已贓論以正議大夫兵部侍郎諸道鹽鐵轉運使上柱國河東縣開國子裴休守禮部尚書進階金紫以前宣歙觀察使太中大夫檢校左散騎常侍裴諗權知兵部侍郎十月己亥京兆尹韋博奏京畿富戶爲諸軍影占苟免府縣色役或有追訴軍府紛然請准會昌三年十二月勅諸軍使不得強奪百姓入軍從之十一月中書侍郎兼吏部尚書平章崔龜從檢校尚書左僕射汴州刺史充宣武軍節度使沙州置歸義軍以張義潮爲節度使太子詹事姚康猷帝王政纂十卷又撰統史三百卷上自開闢下盡隋朝帝王美政詔令制置銅鹽錢穀損益用兵利害下至僧道是非無不備載編年爲之國子祭酒馬審奏

文宣王廟始太宗立之睿宗書額武后竊政之日改篆題大周二字請削之從之十二月盜斫景陵神門戟京兆尹韋博罰兩月俸貶宗正卿李文舉睦州刺史陵令吳閱岳州司馬奉先令裴讓隋州司馬是歲湖南大饑

六年春正月戊辰以隴州防禦使薛逵爲秦州刺史天雄軍使兼秦成階兩州經畧使二月右衛大將軍鄭光以賜田請免租稅宰相魏謩奏曰鄭光以國舅之親賜田可也免稅無以勸蒸民勅曰一依人戶例供稅三月隴州刺史薛逵奏修築定成關工畢四月丁酉勅常平義倉斛斛每年檢勘實水旱災沴處錄事軍先勘人戶多少支給先貧下戶富戶不在支給之限以禮部尚書諸道塩鐵轉運等使裴休可本官同平章事五月勅天下軍府有兵馬處宜選會兵法能弓馬等人充教練使每年合教習時常令教習仍於其時申兵部御史臺奏諸色刑獄有關連朝官者尚書省四品以上諸司三品已上官宜先奏取進止如取諸色官狀即申中書取裁從之秋七月丙辰前



淮南節度使金紫光祿大夫檢校尚書左僕射兼揚州大都督府長史御史大夫上柱國贊皇郡開國公食邑一千五百戶李珣卒贈司空勅犯賊人平賊據律以當時物價上旬估請取所犯之處其月內上旬時估平之從之檢校司空太子少師上柱國范陽郡開國公食邑二千戶盧鈞可太原尹北都留守河東節度使九月勅起居郎轉官月限宜以二十箇月

七年春正月壬辰金紫光祿大夫守太子少傅分公司上柱國晉陵郡開國公食邑二千戶歸融卒贈右僕射宗正卿李文舉貶睦州刺史四月以御史大夫鄭朗爲中書侍郎同平章事五月左衛率府倉曹張戣集律令格式條件相類一千二百五十條分一百二十一門號曰刑法統類上之七月以正議大夫尚書左丞上柱國賜紫金魚袋崔瓘爲刑部尚書以銀青光祿大夫行兵部侍郎知制誥文翰林學士蘇滌爲尚書左丞權知戶部侍郎崔瑋可權知兵部侍郎十月尚書左僕射門下侍郎平章事大清宮使弘文館大學士崔鉉進續會

要四十卷修撰官楊紹復崔瑒薛逢鄭言等賜物有差

八年春正月陝州黃河清二月南蠻進犀牛詔還之三月勅以旱詔使疏決繫囚宰相監修國史魏謩修成文宗實錄四十卷上之修史官給事中盧耽太常少卿蔣偕司勳員外郎王渢右補闕盧吉頒賜銀器錦綵有差以山南東道節度使檢校戶部尚書襄州刺史上柱國酒泉縣開國子食邑三百戶李景讓爲吏部尚書五月以中書舍人翰林學士韋澳爲京兆尹以戶部侍郎翰林學士承旨上柱國武功縣開國子食邑三百戶蘇滌檢校兵部尚書兼江陵尹御史大夫充荆南節度管内觀察處置等使七月銀青光祿大夫守門下侍郎同平章事魏謩兼戶部尚書八月以司農卿鄭助爲檢校左散騎常侍兼夏州刺史御史大夫上柱國榮陽縣開國男食邑三百戶夏綏銀宥等州節度營田觀察處置押蕃落安撫平夏党項等使

九年春正月辛巳銀青光祿大夫祕書監許昌縣開國男陳商卒贈工部尚書二月中書侍郎兼禮部尚書同平章事裴休檢校吏部尚

書兼汴州刺史御史大夫充宣武軍節度使汴宋亳穎觀察處置等使三月試宏詞舉人漏泄題目爲御史臺所劾侍郎裴諗改國子祭酒郎中周敬復罰兩月俸料考試官刑部郎中唐枝出爲處州刺史監察御史馮顥罰一月俸料其登科十人並落下其吏部東銓委右丞盧懿權判以吏部侍郎鄭涯檢校禮部尚書兼定州刺史御史大夫充義武軍節度易定州觀察處置北平軍等使御史臺據正月八日禮部貢院捉到明經黃續之趙弘成全質等三人僞造堂印堂帖兼黃續之僞著緋衫將僞帖入貢院令與舉人虞蒸胡簡黨贊等三不及第許得錢一千六百貫文據勘黃續之等罪款具招造僞所許錢未曾入手便事敗奉勅並准法處死主司以自獲姦人並放七月以河東節度使檢校司空太原尹北都留守上柱國范陽郡開國公食邑二千戶盧鈞守尚書右僕射八月以門下侍郎守尚書右僕射監修國史博陵縣開國伯食邑一千戶崔鉉檢校司空同平章事兼揚州大都督府長史充淮南節度副大使知節度使事宣宗宴餞賦

詩以賜之九月昭義節度使檢校禮部尚書兼潞州大都督府長史御史大夫上柱國賜紫金魚袋鄭涓檢校刑部尚書太原尹北都留守御史大夫充河東節度管内觀察處置等使十一月以河南尹劉瑑檢校工部尚書汴州刺史兼御史大夫充宣武軍節度宋毫汴穎觀察處置等使以中書舍人鄭顥爲禮部侍郎

十年春正月乙巳以正議大夫華州刺史潼關防禦鎮國軍等使上柱國隴西縣開國男食邑三百戶賜紫金魚袋李納檢校左散騎常侍兼越州刺史御史大夫浙江東道都團練觀察等使三月中書門下奏據禮部貢院見置科目開元禮三禮三傳三史學究道舉明算童子等九科近年取人頗濫曾無實藝可採徒添入仕之門須議條疏俾精事業臣已於延英面論伏奉聖旨將文字來者其前件九科臣等商量望起大中十年權三年滿後至時赴科試者令有司據所舉人先進名令中書舍人重覆問過如有本業稍通堪備朝廷顧問即作等第進名候勅處分如有事業荒蕪不合送名數者考官即議朝責其

童子近日諸道所薦送者多年齒已過僞稱童子考其所業又是常  
流起今日後望令天下州府薦送童子並洎實年十一十二已下仍  
須精熟一經問皆全通兼自能書寫者如違制及本道長吏亦議懲法  
從之四月癸丑以刑部郎中盧搏為廬州刺史以給事中渤海郡開  
國公食邑二千戶高少逸檢校禮部尚書華州刺史潼關防禦鎮國  
軍等使六月以兵部郎中裴夷直為蘇州刺史九月以中書舍人杜審  
權知禮部貢舉十月以邠寧慶節度使檢校禮部尚書邠州刺史上  
柱國賜紫金魚袋畢誠為檢校兵部尚書潞州大都督府長史御史  
大夫充昭義節度副大使知節度使潞邢洛等州觀察使桂管觀察  
使令狐楚卒贈禮部尚書十一年春正月以銀青光祿大夫守吏部  
尚書上柱國酒泉縣開國男食邑三百戶李景讓為御史大夫以朝  
請大夫守御史中丞兼尚書右丞上柱國賜紫金魚袋夏侯孜為戶  
部侍郎判戶部事以朝散大夫守京兆尹上柱國扶風縣開國男食  
邑三百戶賜紫金魚袋韋澳檢校工部尚書孟州刺史御史大夫充

河陽三城節度孟懷澤觀察處置等使先是車駕將幸華清宮兩省官  
進狀論 奏詔曰朕以驪山近宮真聖廟貌未嘗修謁自謂闕然今  
屬陽和氣清中外事簡聽政之暇或議一行蓋崇禮敬之心非以逸  
遊爲事雖申勅命兼慮勞人卿等職備禁闈志勤奉上援據前古列  
狀上章載陳懇到之詞深覩盡忠之節已允來請所奏 以紓南西  
川節度副大使知節度事管内觀察處置統押近界諸蠻及西山八  
國雲南安撫等使特進檢校司徒同中書門下平章事兼成都尹上  
柱國太原郡開國公食邑二千戶白敏中以本官兼江陵尹充荆南  
節度管内觀察處置等使二月以夏綏銀省節度使通議大夫檢校  
左散騎常侍夏州刺史御史大夫上柱國榮陽縣開國男食邑三百  
戶賜紫金魚袋鄭助爲檢校工部尚書邠州刺史充邠寧慶節度管  
內營田觀察處置兼充慶州南路救援塩州及常道公路鎮寨糧料  
等使以右金吾衛將軍田在賓檢校右散騎常侍兼夏州刺史代鄭助爲  
夏綏銀省節度等使以荆南節度使銀青光祿大夫檢校兵部尚書兼

江陵尹御史大夫上柱國武功郡開國男食邑三百戶蘇滌爲太常卿以銀青光祿大夫守門下侍郎兼戶部尚書同平章事監修國史上柱國魏謩檢校戶部尚書同平章事兼成都尹充劍南西川節度副大使知節度事以太中大夫守工部尚書上柱國賜紫金魚袋崔愔由爲中書侍郎同平章事以成德軍節度鎮冀深趙觀察處置等使起復雲麾將軍守左金吾衛大將軍同正檢校兵部尚書鎮州大都督府長史王紹鼎爲銀青光祿大夫檢校尚書右僕射餘官如故以通議大夫守中書門下侍郎兼禮部尚書同平章事集賢殿大學士上柱國賜紫金魚袋鄭朗可監修國史太中大夫守工部尚書同平章事上柱國賜紫金魚袋崔愔由可集賢院大學士三月起復朝請大夫深州刺史御史大夫兼成德軍節度判官王紹懿可檢校左散騎常侍鎮府左司馬知府事充成德軍節度副使兼充都知兵馬使以成德軍中軍兵馬使銀青光祿大夫檢校太子賓客兼監祭御史上柱國王景胤可本官深州刺史本州團練守捉使檢校左散騎

常侍右神武大將軍知軍事王紹孚可落起復依前右神武大將軍  
紹懿紹孚鎮州王紹鼎之弟也景胤紹鼎子也以朝請大夫檢校刑  
部尚書華州刺史上柱國鄧縣開國男食邑三百戶賜紫金魚袋蕭  
儼為太子賓客分司東都四月以職方郎中知制誥裴坦為中書舍  
人以朝議大夫權知京兆尹崔郢為濮王傳分司東都以決殺府吏  
也以江西觀察使洪州刺史御史中丞上柱國賜紫金魚袋張毅夫  
為京兆尹以鳳翔節度使正議大夫檢校戶部尚書兼鳳翔尹上柱  
國襲晉國公食邑三千戶襲實封一百五十戶裴識可許州刺史充  
忠武軍節度陳許蔡觀察等使以吏部侍郎盧懿檢校工部尚書兼  
鳳翔尹御史大夫鳳翔隴右節度使以中書舍人鄭憲為洪州刺史  
御史中丞江南西道都團練觀察處置等使仍賜紫金魚袋以安南  
宣慰使右千牛衛大將軍宋涯為安南都護御史中丞本管經畧招  
討處置等使以幽節度使張允伸弟允中為荊州刺史允千檀州刺  
史允辛安塞軍使允舉納降軍使並兼御史中丞以前邠寧節度使



朝議大夫檢校工部尚書邠州刺史上柱國賜紫金魚袋柳憲可檢校禮部尚書河南尹五月以職方郎中李玄為壽州刺史六月以朔方靈武定遠等城節度使朝散大夫檢校左散騎常侍靈州大都督府長史上柱國賜紫金魚袋劉潼為鄭州刺史馳驛赴任以給邊兵糧不及時也以安南都護宋涯為容州刺史容管經畧招討處置等使制皇第三男灌封衛王第十一男濠封廣王以朝散大夫守尚書兵部侍郎判度支上柱國彭縣開國男食邑三百戶賜紫金魚袋蕭鄴本官同平章事判度支以右監門將軍知內府省事清河公崔巨綜為淮南監軍以特進檢校司空兼太子太傅分司東都上柱國扶風郃開國公食邑二千戶杜棕本官判東都尚書省兼御史大夫充東都留守東畿汝都防禦使七月以飛龍使宮闈局令王歸長守內侍省內常侍知省事充內樞密使責授邠州員外司馬張直方為右驍衛大將軍八月成德軍節度使檢校尚書右僕射王紹鼎卒贈司空賻布帛三百段以皇子昭王內為開府儀同三司守鎮州大都督府

長史成德軍節度鎮興深趙觀察等大使以成德軍節度副使都知  
兵馬使左司馬知府事御史中丞王紹懿爲成德軍副使留後以義武  
軍節度易定觀察等使檢校禮部尚書定州刺史上柱國滎陽縣開  
國男食邑三百戶鄭涯檢校戶部尚書汴州刺史上柱國克宣武軍  
節度副大使知節度事宋毫觀察亳州大清真等使以四鎮北庭行  
軍涇原渭武節度使銀青光祿大夫檢校右散騎常侍涇州刺史御  
史大夫上柱國范陽縣開國男食邑三百戶盧簡求可檢校工部尚  
書定州刺史義武節度使易定觀察北都天平軍等使以益州防禦押  
蕃落諸軍防秋都知兵馬使度支烏池權稅等使檢校右散騎常侍  
塩州刺史上柱國賜紫金魚袋陸航代簡求爲涇原節度使以翰林  
學士朝散大夫中書舍人賜紫金魚袋曹確權知河南尹汝州防禦  
使令狐緒有善政郡人詣闕請立德政碑頌緒以第緇在中書上表  
乞寢從之以太常卿蘇滌爲兵部尚書權知吏部銓事以銀青光祿  
大夫守散騎常侍上柱國渤海郡開國伯食邑七百日封敖爲太常

卿是月癸亥犯東井九月以秦州刺史李承勛爲朝散大夫檢校工部尚書涇州刺史充四鎮北庭涇原渭武節度等使以礼部郎中楊知溫充翰林學士以中散大夫尚書礼部侍郎上柱國賜紫金魚袋杜審權爲陝州大都督府長史兼御史大夫陝虢都防禦觀察處置等使以銀青光祿大夫檢校司空兼太子太師上柱國范陽郡開國公食邑二千戶盧鈞爲檢校司空同中書門下平章事興元尹充山南西道節度等使右補闕陳嘏左拾遺王譜右拾遺薛廷傑上疏諫遣中使徃羅浮山迎軒轅先生詔曰朕以萬機事繁躬親庶務訪聞羅浮山處士軒轅集善能攝生年齡亦壽乃遣使迎之或異有少保理也朕每觀前史見秦皇漢武爲方士所惑常以之爲誡卿等位當論列職在諫司閱示來章深納誠意仍謂崔慎由曰爲吾言於諫官雖少翁樂大復生不能相惑如聞軒轅先生高士欲與之一言耳宰相鄭朗累月請告三章求免是月乙未薨出於房初度長三尺十月制通議大夫守中書侍郎礼部尚書同平章事監修國史上柱國賜紫金魚

袋鄭朗可檢校尚書右僕射兼太子少保以山南西道節度使中散大夫檢校禮部尚書興元尹上柱國賜紫金魚袋蔣係權知刑部尚書宰相崔慎由兼修國史蕭鄴兼集賢殿大學士以華州刺史高少逸為左散騎常侍以蘇州刺史裴夷直為華州刺史潼關防禦鎮國軍等使以太常少卿崔鈞為蘇州刺史入迴鶻冊禮使衛尉少卿王端章貶賀州司馬副使國子禮記博士李潯為郴州司馬判官河南府士曹李寂永州司馬端章等出塞黑車子阻路而迴故也以成德軍觀察留後御史中丞賜紫金魚袋王紹懿檢校工部尚書兼鎮州大都督府長史御史大夫充成德軍節度鎮冀深趙觀察等使以中書舍人李藩權知禮部貢院十一月太子少師鄭朗卒贈司空銀青光祿大夫檢校尚書左僕射兼太子太保充右羽林統軍御史大夫上柱國榮陽縣開國男食邑三百戶鄭光卒輟朝三日贈司徒仍令百官奉慰上之元舅也宰相崔慎由為中書侍郎兼禮部尚書尚書蕭鄴兼工部尚書餘並如故十二月以昭義軍節度使朝議大夫檢校

工部尚書上柱國平陰縣開國男食邑三百戶畢誠爲太原尹北都留守河東節度使朝議大夫檢校禮部尚書兼太原尹北都留守上柱國賜紫金魚袋劉瑑爲尚書戶部侍郎判度支以翰林學士承旨通議大夫守尚書戶部侍郎知制誥上護軍賜紫金魚袋蔣伸爲兵部侍郎充職以金紫光祿大夫守太子少保分司東都上柱國河東縣開國男食邑五百戶裴休檢校戶部尚書兼潞州大都督府長史昭義軍節度副大使知節度事潞磁邢洛觀察等使以正議大夫行尚書兵部侍郎上柱國河東縣開國男食邑三百戶賜紫金魚袋柳仲郢本官兼御史大夫充諸道塩鐵轉運使以正議大夫檢校戶部尚書兼太子賓客上柱國賜紫金魚袋孔溫業本管分司東都以病請告故也禮部郎中楊知溫本官知制誥充翰林學士以幽州中軍使檢校國子祭酒幽府左司馬知府事御史中丞張簡真檢校右散騎常侍允伸之子也以中散大夫權知刑部尚書上柱國賜紫金魚袋蔣係檢校戶部尚書鳳翔尹御史大夫鳳翔隴右節度觀察處置

等使是歲舒州吳塘堰有衆禽成巢濶七尺高七丈而水禽山鳥鷹隼鷲雀之類無不馴狎又有鳥人面綠毛爪喙皆紺色其聲曰甘人呼爲甘蟲

十二年春正月以晉陽令鄭液爲通州刺史羅浮山人軒轅集至京師上召入禁中謂曰先生遐壽而長生可致乎曰徹聲色去滋味哀樂如一德施周給自然與天地合德日月齊明何必別求長生也留之月餘堅求還山三月以前鄉貢進士于琮爲秘書省校書郎尋尚皇女廣德公主改銀青光祿大夫守右拾遺駙馬都尉以安南本管經畧招討處置使朝散大夫檢校左散騎常侍安南都護御史大夫賜紫金魚袋李弘甫爲宗正卿以中大夫守京兆尹上柱國賜紫金魚袋張毅爲鄂州刺史御史大夫鄂岳蘄黃申等州都團練觀察使以太中大夫福州刺史御史中丞上柱國賜紫金魚袋楊發檢校右散騎常侍廣州刺史御史大夫充嶺南東道節度觀察處置等使以朝散大夫守康王傅分司東都上柱國襲魏郡開國公食邑二千戶賜

紫金魚袋王式爲安南都護兼御史中丞充安南本管經畧招討處  
置等使以朝請大夫前守太子賓客分司東都上柱國鄭縣開國男  
食邑三百戶賜紫金魚袋蕭倂守太子少保分司以朝請大夫檢校  
左散騎常侍右金吾大將軍充右街使上柱國襲太原郡開國公食  
邑二千戶賜紫金魚袋王鎮爲檢校左散騎常侍使持節都督福州  
諸軍事兼福州刺史御史大夫充福建等州都團練觀察處置等使  
以翰林學士朝議郎守尚書司勳郎中知制誥賜緋魚袋孔溫裕爲  
中書舍人充職以右驍衛上將軍李正源守大內皇城留守以朝議  
大夫守尚書戶部侍郎判度支上柱國賜紫金魚袋劉瑑本官同平  
章事依前判度支以太中大夫守中書侍郎兼禮部尚書同平章事  
監修國史上柱國賜紫金魚袋崔慎由檢校禮部尚書梓州刺史御  
史大夫劔南東川節度副大使知節度事代韋有翼以有翼爲吏部  
侍郎二月以前邕管經畧招討處置使朝議郎邕州刺史御史中丞  
賜紫金魚袋段文楚爲昭武校尉右金吾衛將軍以朝議郎守中書

舍人權知禮部貢舉上柱國賜緋魚袋李藩為尚書戶部侍郎以朝  
散大夫守工部尚書同平章事充集賢殿大學士上柱國彭城縣開  
國男食邑三百戶賜紫金魚袋蕭鄴為監脩國史以朝議大夫守戶  
部侍郎同平章事判度支上柱國賜紫金魚袋劉瑒可充集賢院李  
士以渤海國王弟權知國務疑虔昇為銀青光祿大夫檢校祕書監  
忽汗州都督冊為渤海國王以兵部侍郎柳仲郢為刑部尚書以朝  
議大夫守尚書戶部侍郎判戶部事上柱國賜紫金魚袋夏侯孜為  
兵部侍郎充諸道鹽鐵轉運使以朝請大夫權知刑部侍郎賜紫金  
魚袋杜勝為戶部侍郎判戶部事以光祿大夫守左領軍衛大將軍  
分司東都上柱國會稽縣開國公食邑一千五百戶康季榮可檢校  
尚書右僕射兼左衛上將軍分司貶前利州刺史杜倉為賀州司戶  
蔡州刺史李叢邵州司馬以工部郎中制誥于德孫庫部郎中知  
制誥苗恪並可中書舍人依前翰林李士以前右金吾衛將軍鄭薄  
璋前鴻臚少卿鄭漢卿並起復授本官國舅光之子也以銀青光祿大



夫行給事中駙馬都尉衛洙為工部侍郎前濮王傳分司皇甫權為  
康王傳分司以庫部員外郎史館修撰李渙為長安令閏二月以司  
農少卿盧籍為代州刺史前江陵少尹杜惲為司農少卿以河東馬  
步都虞候段威為朔州刺史充天寧軍使兼與唐軍沙陁三部落防  
遏都知兵馬使五月以兵部侍郎鹽鐵轉運使夏侯孜本官同平章  
事六月南蠻攻安南府八月洪州賊毛合宣州賊康全大攻掠郡縣  
詔兩浙兵討平之十二月太子少保魏謩卒贈司徒

十三年春正月以號陝觀察使杜審權為戶部侍郎判戶部事三月  
宰相盧鄭罷知政事守吏部尚書四月以翰林李士承旨兵部侍郎  
知制誥蔣伸本官同平章事五月上不豫月餘不能視朝八月七日  
宣遺詔立鄆王為皇太子勾當軍國事是日崩于大明宮聖壽五十  
詔門下侍郎平章事令狐綯攝冢宰群臣上謚曰聖武獻文孝皇帝  
廟號宣宗十四年二月葬於貞陵

史臣曰臣嘗聞黎老言大中故事獻文皇帝器識深遠久歷艱難備

知人間疾苦自寶曆已來中人擅權事多假借京師豪右大擾窮民  
洎大中臨馭一之日權豪歛迹二之日姦臣畏法三之日闔寺薨氣  
中是刑政不濫賢能效用百揆四獄穆若清風十餘年間頌聲載路  
上宮中衣澣濯之衣常膳不過數器非母后侑膳輒不舉樂歲或小  
饑憂形於色雖左右近習未嘗見怠惰之容與群臣言儼然煦接如  
待賓僚或有所陳聞虛襟聽納舊時人主所行黃門先以龍腦盥金  
藉地上悉命去之宮人有疾醫視之旣瘳即袖金賜之誠曰勿令勅  
使知謂予私於侍者其恭儉好善如此季年風毒召羅浮山人軒轅  
集訪以治國治身之要其伎術詭異之道未嘗措言集亦有道之士  
也十三年春堅求還山上曰先生少留一年候於羅浮山別創道館集  
無恙上曰先生捨我亟去國有災乎朕有天下竟得幾年集取筆  
寫四十字而十字挑上乃十四年也興替有數其若是乎而帝道皇  
猷始終無缺雖漢文景不足過也惜乎簡籍遺落舊事十無三四呿  
墨揮翰有所慷慨

替曰季之英主實惟獻文  
粃輝盡去淑慝斯分河隴  
歸地朔漠消氛  
到今遺老謠詠明君

唐書本紀卷第十八下